

瓊山縣志卷之十七

金石

新建萬壽宮記

碑高六尺濶二尺二寸篆額

瓊郡古稱海外名邦而文事武功則至聖朝而大備地雖去京師甚遠而臣下奉職何若則無一不在九重坐照之中官茲土者何敢不共矢寅清以敬事者敬告君時懷咫尺天顏於夙夜哉是臣子之分其翼翼小心固不待歲時朝賀始昭昭以致恪恭也而值舉慶典則尤所當兢兢焉然則祝聖之官固禮所首崇歟前此缺而未舉非今之所敢安也臣庶與前郡守李毓元商之願臣武進陞及諸將弁敬謀所以舉其禮制者各願捐俸

瓊山縣志

卷十七

金石

一

以襄厥工自總鎮而副參遊守自道員而府廳州縣雖捐數有差等而藉伸葵向之心則一爰卜地於城之西南特建萬壽一宮外立東西門由是進爲正門列兩掖於傍入則左右有朝房而重門居其中自兩傍入仰觀皇亭嶽嶽儼然金殿玉陛遙臨海外焉工成之時正逢萬壽聖節諸臣行慶賀禮紳耆民黎亦咸歡拜呼嵩瞻仰浹旬每相率歌舞慶爲太平盛事惟其淪浹於教養百年者甚深故其尊君親上之心觀感興起極敬悅欣暢之致而不自知其所以然也若是乎聖天子之聲靈赫濯海外軍民猶且若將見之况我臣子俯伏拜揚如覩齋宮如仰皇慶懍爾心志戢爾威儀能不益勵其寅

清徽寧俾文事武功益彰炳於海外名邦耶即後之効
職茲邦者此心同此敬同雖千萬年其將恪恭如今日
斯舉所繫蓋綦重矣哉是役也督修者瓊州府經歷司
路現廣豐倉大使錢汝臨呈規式效指畫者邑之庠生
鍾世聖也鳩工於乾隆四年己未上冬至次年中秋而
告成焉爰識其端末垂之來茲俾考禮制所由益備云
分巡雷瓊兵備道臣劉庶恭撰 瓊州府知府臣李毓
元 瓊州府海防同知臣靳光耀 瓊山縣知縣臣杜
兆觀 瓊州鎮守總兵官臣武進陞 中軍遊擊兼署
左營事臣劉啟宇 瓊州水師副將臣高華松 鎮標
右營遊擊臣哈雲棟 督修經歷臣路現庫大使臣錢

瓊山縣志 卷十七

金石

汝臨

大清乾隆五年歲次庚申冬月立

瓊南聖壽節記

歲在癸丑仲秋之十有三日恭逢

皇帝聖壽令節

分巡雷瓊兵備道臣張昭美 瓊州鎮水陸總兵臣黃有才

各率僚屬

於是日將旦齋詣

萬壽宮行慶賀禮前後凡六日坐

班如朝儀躊躇濟濟肅敬雍和以應 天庥自七月十

八日日或一至兩甚至八月之九日乃止越明日即慶

日之初朝也碧空如洗靄靄星輝風清和穆 萬壽宮

左右暨各署衙宇民居多有嘉樹名花望之青窻揚之

芬馥禽鳥之音紛流如管絃蜂蝶深深款款誕彌厥期

若競獻媚茲者蓋嶺南之四時皆夏而瓊南爲最也其紳士者老下逮童稚並於正節日伏拜萬壽宮之門外旋即手舞足蹈同觀演劇而爲之致賀也其熙熙居閩巷者或絃歌或聚飲肆筵匝地歡聲沸天節不必效擊壤而氣象同詞不必襲華封而氣味同同始終先後之期焉於時文武員每旦禮畢退亦相集飲射投壺爲歡人不必善飲而飲無不醉者不必善射而射無不中者不必善投壺而投壺無不獲勝者蓋舞蹈時恍如觀咫尺矣顏晏樂時儼若冰湛露之天恩也臣昭美於燕衍之餘乃顧羣僚曰君等知我輩今日之樂乎瓊南地介天末距京師萬里山海窅阻水土異宜民黎雜處號稱難

瓊山縣志

卷十七

金石

三

治憂勞之念尤屢宸衷况官斯土者乎幸際天子聖神澤浹海外方隅寧謐民物安阜加之曰雨曰暘維時維若饑歉無虞寇盜罕聞洵爲海南希有而况此數日者氣融地表雲歛天端形神偕暢觀聽並集而文武諸員協恭同寅上下交洽賓主迭爲式燕其樂何如雖四海晏安普天同慶萬方之樂大抵觀是是在瓊南者實屬不易致之遭逢也臣孔傳派等咸避席而起曰某等碌碌賴二公表率下以爲民上以爲國尤協輿情感召天和始克獲此二公勉勉弗倦歲歲有此樂矣臣昭美笑而頷之遂命臣宋鑄捧筆而爲記

分巡雷瓊兵備道

臣

張昭美

瓊州府知府

臣

孔傳派

瓊州府海防同知臣宋鑄 儋州知州臣姚廷光 萬

州知州臣朱宣 崖州知州臣趙宏文 瓊山縣知縣

臣楊宗秉 署瓊山知縣臣左鵬 文昌縣知縣臣梅

紹王 署文昌知縣臣王德地 澄邁縣知縣臣張必

剛 定安縣知縣臣王璋 臨高縣知縣臣張璋 樂

會縣知縣臣劉以禮 會同縣知縣臣李光華 陵水

縣知縣臣田宏祚 昌化縣知縣臣李孔標 感恩縣

知縣臣林贊 瓊州府教授臣鍾南麟 瓊州府訓導

臣寥嗣莊 瓊山縣教諭臣劉象年 瓊山縣訓導臣

黎天棟 鎮守廣東瓊州等處地方總兵官署都督同

知臣黃有才 瓊州鎮標中軍游擊兼署左營事臣劉

瓊山縣志

卷十七

金石

四

啟宗 協守瓊州水師營副將臣高華松 瓊州鎮標

右營游擊臣哈雲棟 委署瓊州水師協標中軍都司

臣何士鈞 左營守備臣陳國英 右營中軍守備臣

呂文輝 瓊州府海防同知臣宋鑄恭撰 瓊山縣知

縣臣左鵬書丹

乾隆八年八月吉旦啟勒

案會同縣李光華樂會縣劉以禮府志職官以為九年
十年任據碑立於八年則李劉二知縣必是八年任斷
無未到任而碑預刻其名者府志有誤又誤光華為安
華左營守備陳國英志亦不載是其遺漏

新建武廟碑記 存

古者爵莫貴於公侯是故先王之制祀典五嶽視三公
四瀆視諸侯祝號牲幣咸依其班沿及後世遞有增飾
我國家禮樂修明超越千古懷柔百神典章布昭洪纖
畢舉莫可殫述恭逢世宗憲皇帝德參造化誠格幽明
以故尊崇武廟隆以帝號歲凡三祭做崇聖祠之制追
封三代公爵祭於後殿我皇上復增歲事之費頒祝嘏
之文昭報之隆亘古僅見斯誠禮制崇隆神人胥悅也
已余膺簡命備兵雷瓊下車後遵禮參謁廟在道署右
畔抱珥山巔即所稱瓊臺也明初改建歷今垂四百年
基址偏仄不合程式明宮齋廬並無其所思念春秋將
祀文武咸集難於成禮而且多歷年所甌甌傾欹椽桷

朽腐非更張而恢宏之其何以妥神靈而昭國家備極
崇祀之大典歟公務餘暇遇有司進見與論吏治得失
自簿書錢穀而外凡一切壇廟爲秩祀攸關者靡不講
求素知瓊山令楊君遠感具敏練才又勇於公事乃集
文武僉議移建之事而以土木之役畀楊君董其成於
是擇地其於府學宮之西東西得八丈有五尺南北二
十有五丈各捐廉俸都得一千二百餘金庀材鳩工興
役於乾隆九年十月越明年五月訖功夫因陋就簡吏
治之所以日竄也奮庸興事風化之所以維新也而衆
志輯睦詢謀僉同協恭之所以共濟也是役也轉移在
跬步之間舉昔日之棟宇垣墻酌量而增廓之遂覺規

模宏做體製尊嚴與徽號爵秩赫奕相稱可不謂用力少而成功多也歟欽惟聖訓諄諄君民上者不得以官爲傳舍然則廟宇之規必合禮制而諸君子不生異議不辭勞瘁俾海外荒鄙之地曉然於祀事之鉅典斯亦無忝厥職之一端也故於落成也刊石而爲之記分巡雷瓊兵備道謝繼撰

乾隆十年歲次乙丑冬十月立

新建蘇泉書院記

瓊士之以能文著也自宋姜唐佐始也瓊士之與於進士科第也自宋陳孚始也河源涓滴僅資濫觴迄乎有明咸時而瓊山邱文莊公出焉領鄉解掇高第回翔玉

瓊山縣志

卷十七

金石

六

署容與黃扉而且著述等身巍然爲一代大儒後進之士親炙興起咸思淬勵成立致身通顯而科名鼎盛仕宦顯榮藐茲一島四州幾與吳楚同風然讀文莊家傳載其天生異質讀書過目成誦既領解額赴春官試不第則詣太學以卒遠業旅食京師者凡八年詎此八年中所得於名公鉅卿之議論事采直諫多聞之切劇觀摩與夫蘭臺虎觀之藏天祿石渠之秘所以開擴其見聞增益其心性者不爲不多矣其資之敏也如彼而學之專且久也如此以此知遠到之器不朽之業爲偉男子所自樹立而非簡陋因循者不能幾也國家文教覃敷浸淫周匝百年以來海隅徼塞四方萬里之外荒山

僻壤之士皆知奮興不甘自棄於堯舜之世乾嘉九年
余膺命與郡斯地月課諸生及歲科試童子亦所爲
切理脈而合繩墨之藝絕少間一有之亦乞靈於鬼園
冊子而已細推其故六抵一矜已青便束書不望至有
老牖下終身不一赴秋闈者人事不齊因而科名仕宦
落落如晨星不得謂人材固於地方也雖然情竇成風
咎不獨在下也鼓舞董勸司民牧者實操化導之權余
乃擇勝於浮粟井旁爲建書院之計適瓊令楊君遠感
雅有同志乃俾之董其成合捐廉俸塹山墳壘建講堂
繕學舍備器用計爲屋四十八間計費白金二千餘兩
時日十閱月而役畢於是延師以課之膏火以仗助之

多購經籍以醞釀之曾子固有言士有聰明樸茂之質
而無教養之漸則其材不成是則余與令之任也傳曰
學猶殖也不殖將落是則汝諸生之任也諸生肄業此
間遊蘇公之宇飲蘇公之泉想像遺徽既有以燥雪其
精神而且曉望晚眺值夫碧溪新漲悟風水之變我以
文章也綠野香荷欣池沼之觀我以君子也秋則亭前
皓月占蒙養之正冬則檻外寒秧見天地之心嘉元凌
門而有初陽之塔影清輝拱几而有百雉之霞光由是
觀之四時之變易晦明風雨之勝景其足以相機而拓文
心又當何如有志者能勿蹶然興歎故於其落成也勝
之曰蘇泉書院而詳述鄉先輩之所以盛繼此之所以

衰與今日欲復還於盛之機以從溷諸生而勒於石俾後之人得以觀覽焉

瓊州府知府閩中于需撰文

瓊山縣知縣絳州楊宗秉書丹

乾隆十一年歲次丙寅冬月立

蘇文忠公石刻像贊

飛仙耶此公春夢耶此公公自以爲七尺頑軀耳然而髯之絕倫逸羣也則視千古而尤雄彼秉釣者誰氏何爲乎使反不安於汴而貶謫乎粵東迄今七百載矣吾猶遇之循州之郭白鶴之峰

案此石像由惠州摹本入刻觀贊結二語自見其年已

瓊山縣志

卷十七

金石

八

人能辨識碑原在蘇泉書院故編於此今在蘇公祠

新建普濟堂記

瓊之俗信巫不信醫瓊之異產足以聚四方之客而地又處南離之極火行獨旺以故五運六氣之沴迴異海北而蒸爲黎瘴颯爲海風境外人多不相宜於是隻身徒手之客深入黎歧致貨海口以逐蠅頭之微者冒嵐風衝蛋雨恒易爲所中傷夫貧民爲衣食所累輕去家鄉以謀鏹銖斯已悲矣乃又貿貿焉客於風之炎熱俗不信醫之瓊道其病也扶持無人調攝無資煢煢一身形影相憐斯固濟人利物之君子所惻然動念者也乾隆五年前令杜君率士商創藥王廟一座三楹廚房一

間延習醫一人居住調養貧病孤客乾隆七年前令江
君詳准撥定安臨高二縣充公槲羨銀共五十餘兩解
瓊支給藥餌口糧之需二君規畫區處意美法良洵可
爲勤求民瘼而惠及行旅也已未幾舊廟以地基低窪
復經風雨薄蝕棟宇牆壁岌岌有傾覆之虞而且無房
屋以棲病者也無床几器皿以備用也是其名與實之
不相副也余縮廉俸折去舊廟填高故址更張而鼎建
之又增置向北迴廳三間東西廂房六間捲蓬一間什
物之用庖福之所犁然皆備周繚以垣外爲大門規模
恢宏器用物具來此者頗有如歸之致因頌之曰普濟
堂嘗考周禮太宰之屬有醫師之掌政令其屬有疾醫

以治內證有瘍醫以治外證凡邦之有疾病者死瘍者
造焉使醫分而治之歲終稽其醫事以制其食夫先王
設官也方伎小道職之以上士又隸於天官其爲變理
補救之道意義精微以故民無夭札物無疵癘咸相安
於蕩蕩平平之世余承乏斯邑冰兢供職外念無以酬
皇恩與憲德者故緣飾前人之意而革故鼎新且增擴
其所未備以竊比周官於一二昔范文正公未遇時不
得爲良相則願爲良醫語曰上醫醫國其次醫人醫國
者良相也醫人者良醫也二者余皆未之能也然其意
有與古人合焉者願後之君子勿小視此意而護持之
俾永勿壞則斯堂之所濟者誠普矣夫是爲記

瓊山縣志知縣楊宗秉撰

乾隆十一年歲在丙寅月立

修文峯塔併重建文昌祠觀音堂茶亭記

出郡西郭門折而南八里許平蕪蒼莽中一塔巋然曰文峯考郡邑志載南門外有雁塔三元峯人祀又有雁塔亭元建明萬厯間郡伯唐公可封移郡學後三元碑豎峯上欲築峯爲兩學文筆不果詳此則三元峯爲唐公之所建然無所謂塔也其載文峯塔條下云瓊人謂此塔關係文運咸衰自塔圯六十餘年科第寥寥並不言建於何時建之者何人再考副憲焦公映漢重建塔記稱先是有石塔簪之如立筆狀是則雖有塔之名未必

瓊山縣志

卷十七

金石

十

能如茲之浮圖七級也康熙四十三年甲申郡伯賈公棠偶卓長木一杆於舊址標識其上越明年大比瓊屬中僑者六人爲國朝來所僅有而塔餘文運之說遂信而有徵於時當道倡相合諸紳士得三百金付瓊令王君獻甫台其尖比訖事共費九百餘金此文峯鼎建之由距今剛四十年歲月未深前此勸事之人猶有存者固能纒纒陳說也既而王君就塔前建文昌祠一所三楹翼以兩廡六楹祠外建茶亭數椽以憩行人蓋塔勢孤標聳秀若落復得此祠以增其勝洵巨觀也無如颶風暴雨不時迭作邇來塔級闌干陵夷崩頽而祠宇崩腐柱朽椽傾欹難支敗垣殘瓦穢積滿地一望荒煙蔓

草無復過而聞者乾隆十一年余既與府憲於公合建蘇泉書院集師生敬業其中書聲朗朗彌天地而曼金石習經義生咸有起色邑紳士仍籲余借助於地靈也余欣然從之捐廉俸二百餘金鳩工庀材擇仲冬之吉修復名塔磴級雕欄煥然改觀復於塔之南北重建文昌祠三楹觀音堂二座各三楹左側茶亭三楹外繞以垣鍵以大門三闕月而工告成夫堪輿家言儒者所不道瓊當前明科第盛時未嘗邀靈於此塔也卽此塔已建以來瓊人士未聞能步先哲之後塵也而謂文運盛衰實關乎塔其果足信也歟然而買公木杆則已著驗彰明矣究尋其故或者瓊境火行獨旺塔適當離象文

瓊山縣志

卷十七

金石

十一

明之位譬之滿庫確黃得一星火線遂致煙燄彌空此則木杆成致之說也然易發者火易燿者亦火也火將盡矣必得薪以傳之然後復然之勢炎炎不絕此則余重修之說也大抵三才之道相附而行平賊往復有必至之理在有心世道者乘其時而振興之耳他時海外文運重起媲美前人雖不必歸功於此塔而余實備官斯地則亦未嘗不與有榮施也是爲記

瓊山縣知縣楊宗彙撰

乾隆十二年歲在丁卯夏月之吉立

重建天寧寺碑記

郡郭內外梵宮釋宇無慮數十於天寧一寺而重建之

者何曰復古也其爲復古奈何志載此寺昉於宋名天南元更今額明人又移置而式廓之計其歷劫固已五百餘年之剝也古之宜復者夥獨以天寧爲古而復之者何曰此非剝之古之謂而前人尊親禮法之場也其爲尊親禮法之場奈何志載明初郡邑迎詔官師習儀皆在寺中迨萬厯間郡守唐公可封建藏龍亭於正殿後安奉萬壽龍牌於是歲時朝賀慶祝諸大典無不藉此抒誠展禮而屢修屢圯亦旋圯旋修不惜捨官府紳士之金錢者匪特爲禪定梵誦之林而已也國初習仍簡樸萬壽龍亭或奉移公所或奉考院今則萬壽宮闕赫奕天表此等不爲官府所遊厯者荏苒百年而潛流

瓊山縣志

卷十七

金石

五

輩復罕能支持山門以故古刹一敗塗地法像露天釋子並無託足之所匪伊朝夕矣余洎瓊之明年邑人有以重建古寺請者計其役浩費大非一肩所能勝任旣而念羶羊小物尚關大典而况有明一代荒徼浮嶼之臣子所藉以序班聯之肅穆抒忠愛之惻愾糜費物力建不一建修不一修布在志乘章明較著而顧聽其影沈響寂消歸無有其爲後人之憑弔歛歔者豈但愛羊之失哉余乃倡捐一百二十金合諸紳士行商所釀都得六百餘金延邑中庠生林君世聖總其事涓吉興功建正殿三楹重簷複道爽塏虛白前爲金剛殿三楹又前爲大門三楹僧室齋廚備具繞以短垣塗以黝亞復

重飭法像莊嚴鉅麗越期月而下竣是役也不踰僦不糜財既宏既壯亦華亦堅前人稱爲海南第一禪林者於今乃復見之豈惟晨鐘暮鼓聆古刹之餘韻抑亦足令來茲論世者得所證據也故伐石而記之

瓊山縣知縣楊宗秉撰並書

乾隆十二年歲次丁卯冬月立

重修金粟菴正殿併新建禪堂記

蘇文忠公精熟釋家言機鋒說偈真能游戲三昧爲一時高僧所懾服以故生平與大覺實覺圓通寥寥寶月輩往來贈答甚夥嘗樂任之日且爲佛印解玉帶以鎮金山其豪宕豁達之趣尤非世俗人所能測識寓也時

瓊山縣志

卷十七

金石

三

辯禪師欲遠書而南華淨人皆輕千里爭請行猶欲一見東坡翁求數字終身藏之洎乎居僦以來嶺海遼遠知交音耗多濶絕無問方外友矣然而後之人景仰遺徽每於過化之地尸而視之併欲有以闡翼公之慧業此金粟菴之所由附建於祠西也乾隆十一年瓊山家明府旣與府憲于公合修蘇祠復拓左右基址鼎建蘇泉書院走幣三千里外延余掌其教事居常以此庵庫隘與祠不稱爲嫌而余鄉親友之文雅嗜義客寓此邦者以余故枉駕過從相與坐庵中汲泉瀹茗披襟話舊亦慨然有重葺梵宇改築精舍之意其明年明府倡捐而欣然樂助者遂得十一人工料畢集閱月落成於是

規模宏敞輪奐燦然而面城枕崗連村帶畝林泉之勝
風物之光真堪以衍宗風而與金山解帶之意頗相彷彿
想蘇公在天之靈應因時憫不獨足供文人墨客之
遊覽吟嘯也已故頌於堂曰玉帶遺徽用誌景仰之誠
云爾維時襄事者有授邑佐則陳君國安明經則林君
中鳳陳君益澆黃君科先太學生則黃君祖成李君珍
陳君士珏許君飛鴻黃君大輝其一則余也皆潮人董
理土木諸務則邑人生員鍾君世聖也是舉也役浩人
寡例得備書

蘇泉書院院長大埔楊繼烈撰並書

乾隆十二年歲在丁卯冬月吉日立

瓊山縣志

卷十七

金石

西

德公關三太字碑

公諱明號集賢滿洲正白旗人廣東分巡雷瓊兵備道
乾隆甲戌年五月吉日紳士商民仝立

重修潘公河碑記

郡城南河由東門橋迤邐而北下達海口其來舊矣自
前觀察潘文恪相度地宜鳩工興修瓊人賴其利勒石
河干名曰潘公地以人傳也十餘年來半就淤塞每水
涸灌溉無資舟楫弗通名存實亡識者惜之余監司雷
瓊歷訪民隱知潘公河之爲利鉅而開濬宜亟也抑舊
制猶有未盡應畧爲變通者夫河有上流下流有旁流
是河之源一發自龍湖本支甚淺一發自廕潭謝潭并

入於沖夫河旋轉而出其勢爲大河所奪細流涓涓無
由利濟惟於博沖口遊設滾壩則二潭專一內向而上
流裕矣下流出窰窟外與潮接潮落輒滯於下窰口壩
以石圍壩時開閉水少蓄其勢使下進下多則洩之庶
下流源源可繼矣蓋二者河之樞紐潘公僅治河身於
前茲則交治河之源流於後者也且此猶爲水少計也
夏秋霖雨時降一河不足以受兩源之水又於旁流舊
河久經塞築者敗爲滅壩俾落有所束長有所分而全
河之大勢底績矣先是副使王公斗南暨大守宗賈二
君與夫鄉之薦紳於潘公前屢有修治至潘公而功愈
茂名愈彰今雖變而加詳總此惠農田通商旅百千年

瓊山縣志

卷十七

金石

五

利濟吾民之心而已是役也羣情鼓舞樂事勸功其費
白金八百兩有奇四越月而工竣郡丞李君諳河務多
資贊勳昌化伍令與有勞勩備前巡檢潘景魏瓊山典
史劉起坤奔走從事例並得書是爲記
分巡雷瓊兵備道德明撰

瓊州府海防同知李璜書

督工備前巡檢司潘景魏瓊山縣典史劉起坤

乾隆二十一年歲在丙子秋月立

重修三公祠記

無額高六尺二寸濶二尺六分二十一行
每行五十五字

道之同者其精靈必同其俎豆之馨香亦同瓊郡城西
舊有三公祠並峙相連百有餘年矣蓋以文章節義蘇

公著於宋丘海二公顯於明其揆一其廟食一也况載
酒品泉流芳斯土則在昔先民以祀丘海者祀蘇誰曰
不宜余少讀三君子著想見其爲人每欲識其里居奉
天子嘗學命去秋按臨斯郡悉其祠所在試事竣卽沐
浴恭謁瞻拜之下深喜素願獲慰誠如司馬氏所言雖
不能至心嚮往之者歟其祠歲久敗壞棟折垣頽目擊
嗟歎遂欲捐奉爲倡修計但念瞻帷偶駐又非一日不
能久因以其事商之太守左公果與余同志諸事得悉
心經畫俾學博諸君及幹理諸生循而措之用能朽易
爲堅破易爲完也至若紳士題捐共襄美舉是又三公
之文章節義風化在人使然歟余以今夏備悉厥狀知

瓊山縣志

卷十七

金石

六

其成在不日故刊數語以誌於石

提督廣東全省學政翰林院侍讀加一級劉星煒撰

護理分巡道瓊州府知府加五級紀錄五次左興

瓊州府瓊山縣知縣章世熹 瓊州府儒學教授黃壯

訓導謝膏露 瓊山縣儒學教諭鍾天秀訓導李朝機

崖州學正黃德厚 儋州學正譚元訓導梁上達 萬

州學正蕭現璞訓導麥佐 澄邁縣教諭胡經武訓導

李能發 文昌縣教諭陳策訓導梁敏遜 臨高縣教

諭林仰洙訓導官清 定安縣教諭陳子材訓導梁祖

滙會同縣教諭古聖基訓導王欽 樂會縣教諭何泰

謙訓導馮維紀 陵水縣教諭高星 感恩縣教諭鍾

象鵬 昌化縣教諭黃開揚 紳士吳金楊元季王森
秀邱士佳紀緒蔣堅泰馮信蔣孝麟宋廷秀鍾世聖居
杰蔣肇整符詩謝世傑何成恒楊友椿毛喬宗鄭鎮吳
高標馮維權潘球謝泰謙曾宗正吳文道陳世圭王士
英曾宗周邱琦邱士曲陳之英海見龍何士琛文莊公
宗孫邱鎮魁

乾隆二十一年歲次丙子景月吉旦修官謝膏露紳士
王森秀蔣肇整符詩邱鎮魁海見蛟

英佑將軍江公祠壁記

碑石縱橫尺餘大四片築祠壁上

神姓江氏諱起龍江南徽州人官海安水師副將其封
爵曰英佑驍騎將軍之神今海安所海口並有祠往來

瓊山縣志

卷十七

金石

七

渡海者必虔禮焉謹按志載將軍為人仁勇忠直初任
水師參將駐白鶴寨通明港當雷州初開白鶴營署俱
圯又無城塹可守將軍周視白鶴當郡城入海之口為
雷州左臂無白鶴是無雷矣乃捐貲立營寨廣招居民
屯聚為墟市於是舟車輻輳商貨畢集與雷城相應遂
為一方雄鎮是時順治十三年也康熙元年晉副將三
年移水師駐海安口兵民帖服五年出洋捕盜風發舟
覆殞焉民頌其功而思之將軍歿後疊著靈異祈禱立
應雍正八年十二月布政使王士俊請於上欽定爵號
至今官民事祠逾謹方綱以乾隆二十九年冬按試至
此酌酒於神祠而碑記事蹟弗詳退而考據省志郡志

謹書諸祠下而爲之詩曰國語所載以死勤事禦災捍
患著於祀制神則兼之忠直勇仁功垂於疆德施於民
於廓靈海神駕純嘏儵歛駢羅靈旗雲馬作廟奕奕隆
祐孔多以贊皇化重俱靜波爵由帝命蹟爲民恩官屬
奉嘗子孫守之於雷於瓊標燎一氣保疆綏民吏千萬
世

日講起居注官文淵閣直閣事詹事府詹事兼翰林院
侍讀學士廣東提督學政大興翁方綱撰並書

乾隆二十九年歲次甲申冬立

海門社學記

國家養育賢才自省會以暨郡邑無不設有山長課士

瓊山縣志

卷十七

金石

六

以廣作人雅化凡一鄉一井立有社學義學者無非本
宗有正黨有庠之義海口所東南隅原設有社學曰文
昌閣祀梓潼帝君并魁斗星君由來久矣迨後以久年
湮時殊事異社學於是乎廢焉自康熙十八年來歷數
十載凡絃誦子弟謂野處而秀才達者不幾難哉邑中
太學生譚世傑性樂善好讀書與二三有志之士嘗欲
卜勝以復其舊因醵金未足屢創未果而傑至老猶屢
諸念而未已也越至乾隆丙戌年間瓊山學增廣生嚴
孔識呂文勳首倡勸捐成此義舉而譚世傑之子洪昭
克承父志亦與踴躍爭先仍卜地於所內之東北隅社
學之復始基之矣厥後規模日闢果醵金至八百有奇

殆堅集腋之心不成裘而不已迄今壯觀而成奕奕之光造士而昭濟濟之盛帝君鍾靈毓秀文運於以宏開更於前池中築魁星樓一座額其額曰蔚文樓水環四面閣倚層霄煥彩透乎離光卓越凌乎斗極洵爲海門一勝事此皆巖子孔識呂子文勲譚子洪昭相與鼓舞而成者也而諸紳士商民輩樂善好施隨緣共助有志竟成將肄業其間者藹藹吉士振厥文風以鳴盛世匪獨首事之光卽守土者亦與有榮焉余甚嘉此美舉而不可無一言以誌之爰敘其大畧以垂諸永久焉是爲記

護理廣東分巡雷瓊兵備道知瓊州府事皖江蕭應植

瓊山縣志

卷十七

金石

九

撰並書

乾隆三十一年歲次丙戌冬月立

歲貢陳斑墓詩碑

悠悠白髮水雲鄉學道兼耽野興長青黼紅蝦供晚飯
白沙碧竹影茅堂讀書偏愛閒居賦教子能歌曉鹿章
芝玉滿前紛戲綵先生真是傲羲皇 曾元程可則
張樂奏鈞天稱觴競比肩南山開寶曆東壁耀星躔元
洞多丹鼎中峯繞翠煙玉壺懸日月天地得齊年

探花沈 荃

案陳班子會擢康熙五年鄉薦其詩爲會擢請程沈所作以祝親壽後卽刻石墓庭藉存名人之作而非題墓

表詩

瓊臺添設齋舍膏火碑記

郡志載書院之名凡八而東坡粟泉較感由南宋迄元明興廢不一故址皆在郊外至我朝康熙庚寅年特建於城內丁字街而以瓊臺命名者自前陞道焦公始治行卓卓尤精於形家言謂瓊有三臺象三台也道署居中府署居左而設書院於右翼若龍虎得勝地矣爰捐貲置田樹坊勒石所以教育郡人士者其意良厚惟是齋舍無多廩餼有限故院中額取肄業之數僅二十名乙酉冬余調任茲土改歲後彙校各屬州邑生童所錄內外課厥數倍之因念膏火不給謀諸曹邦伯李邑侯

瓊山縣志

卷十七

金石

三

咸欣然樂輸共相鼓勵一載以來文風駸駸日上而余猶慮捐輸之道未可恃爲永圖也適儋州文昌撥歸書院之項總計一歲所入酌增廩餼添建齋舍復加校試取肄業六十人與課在外仿宋代三舍之制上舍月給銀八錢中舍月給銀六錢而又按期程課覈其文行之優絀而升降之以示激勸如此者亦曰述焦公之意毋使廢墜焉耳若夫大展前額廣爲樂育俾十三州縣之俊髦盡沐甄陶自惟才拙竊有志而未逮也願俟後之君子

乾隆三十二年歲次丁亥九月雷瓊觀察使王錦記並書
重修西天廟記

士君子寄形大造每毓天地精英故其生也文章經濟著於當時其歿也俎豆馨香隆於萬世主陽者人主陰者神理固然也若西天大士其廟於斯歷年所矣余膺簡命佐理瓊邑祇謁之日心竊異之乃詢之父老有告於余者曰乃臨之桐鄉王公也大明時以禮經歸鄉薦於正統丁卯仕於成化之初卒於溟海之上靈明南國時磅礴於寰區名震西天作保障於山海都人士乃於所外之西崇其廟而尸祝之蓋自隆慶以來桑滄縱有變易而靈爽依然此商民輻輳舟楫往來沐其澤者不少此乃恍然曰此前代名賢也所謂文章經濟著於當時俎豆馨香隆於萬世者精英所毓不誠歷萬劫而不

磨也乎未幾余又宰於臨得於桐鄉訪公之蹟讀公之書鷄肋集原教庚申諸編而外其薦御珠崖錄一書留述誦之益嘆公之才公之德誠有大功於天下後世其享廟食於千古也固宜雖然威靈震而澤庇深固見洋洋之感棟樑盡而屋宇頽未壯奕奕之觀歲丁丑時有卓行科貢生林君世聖者每圖葺而新之未果而卒迫其嗣茂才拔瓊克承先志爰集同人衆皆踴躍醵金九百乃於辛巳秋庀材鳩工舉凡殿宇齋廚爽塹更之亭臺堦砌黝堊宜之更置坵舖三間以爲常住一時之廟貌維新且爲久遠計者咸稱林子之功居多焉而定規模陳指畫則茂才林輝光尤爲最也余蒞斯土凡有與

於樂善好義尚德崇賢之舉者皆樂道以垂不朽因記而鐫於石

前署雷州府徐聞縣瓊州府文昌臨高會同昌化縣瓊山縣海口縣丞伊益所拜撰

乾隆三十五年歲次庚寅孟夏月上浣之吉

遷建瓊州府學宮碑記

篆額

極南大瀛海沐浴文明百寶之氣加以聖天子道光不冒是彝是訓環匝萬里千村百嶺雅歌之聲相聞人文士氣蒸蒸郁郁日益登躋淳厚昌熾而遷學工適告竣其地在瓊州郡城之中後瓊臺而前瓊山東北挹雙泉之源西引龍潭西湖南帶南湖之水會大江入於海中

瓊山縣志

卷十七

金石

三

直城樓居高居陽爲一郡十四庠序之首中爲大成殿以奉先師孔子旁爲兩廡自門序階闔筵籥朱楹講誦之堂庖湏之所候望宿息罔不畢具經始於乾隆三十四年十二月而以其明年冬落成斯地舊試院也學故在城東南隅先是宋慶歷四年始建郡學淳熙中嘗重修之子朱子所爲記也明宏治時遷縣學於其右而城築於建學之後城廣而學偏迤始議遷學會圯於颺又議遷會郡人員位和等願率私錢助工僉以使者試院地爽塏宜建學乃遷郡學於茲而以故郡學地置院遷縣學於其西北更買地拓之於是兩學聿新郡伯桂林曹侯以郡人之意來請一言爲記方綱三至瓊觀於海

觀於聖人之門則必擇其言之尤切要者記之方綱竊見瓊之士漸摩久而觀感切蓋皆知學之繫於人而關於地必擇高明顯敞之區以營之且當官吏正議修建時闔郡紳士爭先出白金至七十餘兩踴躍倡導功百其倍父老子弟恭敬趨事由此鼻其文化感其科目敦其土俗是所宜書矣而又有進者昔者乙瑛之王錢史晨之家穀詳於奏祀之文而反畧於總理之規教條之善今曹侯之政既章於斯民而以民情願助之實上之部使者其經營度支條件出入之節則令紳士自推其能者核之不以吏役稽焉是侯之敬慎公務有以輔其平日化民成俗之爲者尤宜大書而以方綱所區區欲記

之意則尚有進焉者是學之所最切要而爲他學所不獲有者在朱子一記而其石與字今皆無有也其畧曰昔者聖王作民君師設官分職以長以治而其教民之目則曰父子有親君臣有義夫婦有別長幼有序朋友有信五者而矣蓋民有是身則必有是五者而不能以一日離有是心則必有是五者之理而不可一日離也是以聖王之教因其固有還以導之使不忘乎其初然慮其由而不知無以久而不壞也則爲釋其民之秀者摩之以學校而職之以師儒開之以詩書而成之以禮樂凡所以使之明是理而存之不失傳是教而施之無窮者蓋亦莫非因其固有而發明之而未始有所務於

外也使瓊之士知夫所以爲學者不外於身心之所固
有而用其一日之力焉則其德成行修而無所疑於天
下之理將無難者而凡所謂功名事業云者其本已在
是矣子朱子之言若此則凡入此學者其於仰止聖人
希法前賢之要道舍是曷求乎方綱不敢不敬錄於石
碑觀者深體而加省焉則亦猶之難爲水難爲言之義
矣學又有方石碑一明成化癸巳豐城涂副使棐以八
分書朱子齋居感興詩也謹語曹侯遷之於新堂而和
韻刊示學官弟子焉其戟門壁池宮牆面勢丈尺器物
書籍典守冊目咸有司存放不具著

日講起居注官文淵閣直閣事詹事府詹事廣東提督
瓊山縣志 卷十七 金石 一
學政大興翁方綱拜撰並書
乾隆三十五年歲在庚寅冬月立 碑在府學宮

新建雁峯社學記

存

瓊州在大海之南土地沃衍人物馴雅而文風稱盛於
嶺表乾隆庚寅歲余撫粵下車采風諸郡瓊士咸踴躍
鼓舞度越重洋而以文投獻闕其文率典雅醇正有先
民遺樂良由聖朝聲教覃敷漸被遐陬海滋涵濡沐浴
百有餘年以故南溟裔甸之區巨漲炎烟之城英蔚蔚
興家弦戶誦媲美感於中土昭邦治之同文豈不休歟
今年秋編修吳君興自瓊來謁爲言新建雁峯社學落
成乞一言以記其事地舊爲郡庠遺址在郡治東南隅

其前三峯橫亘爲雁塔三元峯先是瓊州鴻雁不至自
邱文莊讀善郡庠時始一來賓公爲作雁集瓊庠記嗣
郡之紳士以黌宮類水近偏城闔觀瞻未稱會颺風迅
發棟宇飄搖籲於官購校士鎔地更易之而鼎新文廟
焉於是故基開隙形勝家咸謂地屬郡左青龍不宜低
陷僉議請建築社學其名以雁峯者表三峯之勝槩兼
以示不忘昔賢遺蹟也抑余更有說焉古之教者家有
塾黨有庠術有序國有學社學之設於國學爲始基古
之學者七年則小成九年則大成所謂大成者豈惟是
挾策呻吟求工於文藝之謂蓋將以崇本敦實明體達
用而實有所表見於當世也文莊以儒生崛起海外道

其道籍後薇沃君心釐剔朝政卓然爲一代名臣今諸
生幸生文莊之鄉誦習文莊之故地卽當步趨乎文莊
之爲人詩有之高山仰止景行行止飽日占鴻漸而筮
羽儀實有以表於當世焉此則大成之謂余所遙望瓊
臺而殷殷致願者也社學凡建講堂五間文奎樓五間
東西兩齋十二間大門三間周以垣牆規模整肅封編
修吳福暨紳士等八人實捐貲而經理之共釀白金四
千兩需用及半餘以置田諸紳士輪掌其歲入爲延師
膏火并士子賓興之費余嘉封翁是舉之有造於鄉與
編修之繩武濟美且欲使瓊人之知所矜式而興起也
爰諾其請而爲之記

兵部侍郎巡撫廣東等處地方提督軍務兼理糧餉德保撰

乾隆三十六年歲次辛卯秋月立

新建應崇社學記

學有社所以萃子弟之秀而良者延名師訓迪之以使之成人與當道書院義學異號同功而於閭閻尤切近瓊邑自宋元來代有社學悉皆頽廢里紳吳福溫星陽兩喬梓暨杜常輝何朝輔屬文所毛映斗輩嘗殷殷有志建設而未逮焉歲己丑郡學移府治左而以舊址爲試院院之旁多隙地地處僻隅屏闐喧雜聲藏修讀書固其所也一日其子若孫承先志以旣厥工而丐記

瓊山縣志

卷十七

金石

三

於余夫好善之念秉彝同之然前之人見善輒鼓舞子若孫視往訓爲陳言不復記憶卽記憶之亦以爲非必不可緩之務而漠然置之者常也余愛吳氏諸後嗣各輸白蠟經營盡善不分先後不計盈絀各體乃祖乃父之志以爲志莫留遺憾惠及鄉人有如是者而能以不文謝哉學成璀璨光明一律完固令揭金者書姓氏勒碑陰邇謝不違謂前人志弗敢自居其功也然則前人之大有造於瓊之人者終無以示來茲耶卽書乃祖乃父各名字附祀先儒之左使讀書其中者飲水思源不忘所自誰曰不宜是學也定固德大申丞爲之記矣所以垂訓瓊人士諄諄於肄業者之誦習文莊故地當步

趨文莊之爲人他日羽儀王國有以表見於當世者之意深且遠諸生步趨前哲其勿忘中丞屬望後起而不遺濱海一隅之善教也夫

瓊州府海防撫黎同知陳景垣撰並書

乾隆三十六年歲在辛卯冬月立

雁集瓊庠記

碑在縣學署明倫堂

正統壬戌秋八月辛丑予蒞肄業學宮日亭午與同舍生符鍾秀陳汝諧偶息游焉有童子走報曰有鳥集於學宮泮池之中比覩覩而小似鳧鷖而大足指蹼屬毛色蒼白旁皇四顧馴擾而不驚蓋平昔所未嘗見者蓋觀之予偕二友往焉顧謂之曰此易所謂漸於陸其羽

瓊山縣志

卷十七

金石

七

可用爲儀者乎書所謂隨陽以攸居者乎禮之用爲大夫費其土昏攝或以奠者乎是鳥也生於沙漠之墟隨陽南征集於江湖漢河之間乃其所也嶺海之南隔山越河蓋彼飛不能遠到之處胡爲而至此耶茫茫鯨波百川斯委四川之間二三千星之域其間之水匯而爲湖流而爲河渚而沼沚視茲泮池廣袤何啻百倍且此學宮相去重湖僅一堵許彼皆不之集而顧來於茲謂其無意可乎二友叩予以求其故予謂之曰禽鳥天產也其得氣最先而雁又隨陽之鳥秋賓南而冬北歸知時者也其乘氣機而先動尤非他鳥之比昔人聞天津杜鵑之聲而預有所占焉矧茲陽禽素稱知時者乎昔

者地氣自南而北果有南人以文字亂天下今也地氣自北而南安知無南人以文字而治天下耶昔既有驗今亦有驗矣二友戲謂予曰安知非子耶予笑而遜謝焉雁聞人言若對以臆童子舉手倏爾西征歸而筆之以爲雁集瓊庠記

瓊府學廩膳生員鄒秉文敬書

乾隆三十八年歲在癸巳秋月立

移建瓊山縣學碑記

篆額

今國家聖聖相承崇儒重道直省各府州縣立學校設教官分職以教導之百數十年以來涵濡教育士幸生於此際亦孰不思奮興自勵以冀廊廟用哉瓊地古在

瓊山縣志

卷十七

金石

五

荒服自漢通聲教宋始設學於海口明遷郡治我朝康熙丁亥邑令王君贊重爲修建並置祭器規制乃備嗣亦屢圯屢葺志乘可考乾隆辛卯郡紳士以府學舊址據形家言未善謀遷建於府署之東與文明樓相向地勢宏敞更爲壯觀縣學舊在府學之側今則別爲擇地而遷建焉捐資經費爭先從事不日而告成功壬辰冬余奉簡命蒞茲邑邑人士告曰吾侯之來功適成府學碑郡伯蕭公已記之矣今縣學碑非侯屬而何余以不文辭至再不獲已乃爲之曰夫學宮之設所崇聖人之教以教乎人也孟子曰學則三代共之皆所以明人倫也人倫明於上小民親於下子朱子嘗爲瓊管帥韓侯

記明倫堂曰學者不外乎身心所固有而用其力焉則德成行修而無所疑於天下之理凡所謂功名事業云者實已在是矣又曰民之秉彝好是懿德是豈有古今之間遠近之殊哉吾邑爲瓊郡首善之區而瓊郡乃海南之一大都會山海偉代有奇人若明之丘文莊公濬海忠介公瑞文章氣節彪炳史冊百世之下聞風嚮往矧在邑之人士乎且邑又素稱海濱鄒魯豈以山陬海澨而遂甘自棄乎吾願瓊之人士明人倫之道用力於子朱子之言德成行修媲美於文莊忠介二公功名事業將以報朝廷教養之恩足爲郡邑人士所矜式余深有所厚望焉因書以爲記

瓊山縣志

卷十七

金石

五

瓊山縣知縣浙江汪屋撰并篆額 瓊山縣教諭郭尚政訓導謝鸞同首事邑人詣封翰林院編修原任博羅縣學訓導陸教諭吳位和拔貢鄭宗漢生員符詩等立石 瓊山學廩膳生員李琦書丹

乾隆三十八年歲在癸巳仲秋月穀旦

瓊山賓興田租碑記

篆額碑在縣學署明倫堂

周禮大司徒以鄉三物教萬民而賓興之鄉大夫於三年大比攷其德行道藝而興賢者能者以禮賓之此賓興之所昉也我國家文教覃敷人文蔚起山陬海澨之鄉靡不蒸蒸日上瓊邑僻處海外而登賢書者代有其人壬辰冬余來蒞斯邑甫下車卽以振興文教爲已任

甲午秋郡之舉於鄉者七人而瓊邑居其二蓋文風曠
駁乎盛矣余既喜多士爭自濯磨乘時奮興而復念重
洋遠涉赴舉維艱思仿古賓興之典未遠也一日紳士
王時宇邱士佳鄭宗漢符詩等造余而請曰邑故有常
仕官租廼雍正十年士民捐置以給總書暨五年編審
諸費今既奉裁請將此田撥作賓興余稽之案檔因允
所請而令公議經理紳士邑人僉議封編修吳君位和
暨紳士王時宇邱士佳鄭宗漢符詩杜攀稜六人輪掌
歲入互爲經理爰上之道府憲奉飭將書記工食革除
其常住田租遞年除納糧并支伏波廟香燈外存積三
年酌助多士赴舉余竊幸初心之得遂而是舉之有造

瓊山縣志

卷十七

金石

三

於瓊人也今紳士勒石以垂久遠巧余言以爲記余曰
三代以上政教合而爲一出使長者入使治人後世政
教分途邑長專治民事而於賓興賢能之典往往視爲
具文余蒞斯邑數年於茲矣其所以望瓊之人者甚深
而所以教瓊之人者亦殷殷有志今因自然之利復古
制之行胥吏不致侵漁而士人得沾實惠所謂惠而不
費者孰有大於是繼自今瓊士益加奮勉鼓舞振興以
仰副聖天子作人雅化是則區區之意也若夫置田始
末具常住碑中茲不贅其條款數目並書以志之碑陰
瓊山縣知縣浙江汪屋撰並篆額
甲午科舉人本邑吳魁朝書丹

乾隆四十一年歲次丙申仲春上浣之吉

碑陰

今將田丁租米錢糧支給等項開列

一西黎居丁坡田二十六丁每田二熟得北冲民籍租米九百乙十二筭

一東雲橋田乙丁每年二熟得北冲筭租米乙十八筭

一伏波廟香燈每年支錢乙十二千文

一其納條銀六兩乙錢九分八厘二毫共納倉米乙石

五斗二升八合

一議三年除納糧支給外所存之銀經管者於鄉試期

交殷實文生帶起省於八月初一日將瓊山學文武諸

瓊山縣志

卷十七

金石

三

生并本縣之人充府學者按名均分其帶銀之生與縣

歲科文批首三人加倍以寓獎勵

瓊臺二大篆字碑

高五尺六寸濶一尺七寸

石刻乾隆戊戌年孟秋之月右瓊山縣令瀾西汪厘書

篆法雄奇古勁最為難得

諭旨碑

高五尺五寸濶一尺八寸碑諭旨二大字下分十

雍正五年三月二十四日禮部奏會試舉人叨荷特恩

合詞陳謝奉上諭朕視天下萬民皆為一體况讀書鄉

薦之人異日俱可作朕股肱耳目是以朕心待之實有

一體聯屬之意愛育保護即如自厚其身此皆出於中

心之自然並非欲邀天下士子之感頌也今舉子等以

會試叨荷特恩合詞陳謝是尚不能深悉朕一體相關之意而存上下彼此之形迹矣朕待天下惟有一誠而崇儒重道之心尤爲篤切但所崇者皆真儒所重者皆正道若徒尚虛文邀取名譽致貽世道人心之害朕不恐爲也爾等讀書之人實四民所觀瞻風俗所維繫果能誦法聖賢躬修實踐宅心正直行己端方則這籍於朝必能爲國家宜猷樹績膺棟梁之選卽退處鄉閭亦必能教孝勸忠爲衆人之坊表故士習旣端而人心尚有不正風俗尚有不淳者無此理也爾等旣感朕恩卽當仰體朕心恪遵朕訓爭自濯磨或出或處皆端人正士爲國家所倚賴如是方爲實心報效不在感恩奏謝

瓊山縣志

卷十七

金石

三

之儀文也欵此

乾隆四十五年歲次庚子

月

日瓊州府知府蕭應

植敬刊

皇清敕授修職郎博羅縣訓導誥封奉政大夫翰林院編修加四級西峯吳公墓誌銘

瓊之郡鬱乎奇甸文淳而俗厚有篤善君子曰西峯吳公由邑庠選授惠州博羅縣訓導署海豐教諭勤考課虔祀事捐陞教諭留奉錢以儲賓興卷費士人頌之瓊之郡邑兩學舊迫於城垣郡人議遷建數十年弗就公乃議擴府經歷廢署爲縣學而以府學署與試院互易請於當事鳩工庀材費巨萬又建雁峰義塾於府學舊

址皆公倡率爲之由是瓊人登甲乙科者倍盛於前厥嗣興是年成進士改庶吉士國朝百餘年瓊人入翰林者自興始也又嘗倡率鄉之善士創建文昌閣三元廟觀音院普濟堂郡中米價翔貴出錢穀賑之又賣金於雷於潮勸商戶糴穀運濟價遂以平嘗釋感應篇陰騭文諸書刊印廣布效昔人功過格自課日以爲常每五鼓起盥漱焚香琅琅誦釋經典道笈寒暑不輟數十年始公先世清貧由閩遷於瓊之馬定坊後乃遷居郡而公與厥醜陳宜人積勞苦力勤儉家乃稍裕公祖父皆以質厚爲善於鄉詳郡邑志公益闡承而光大之其宗支居馬定者爲之增築其室建大小祠置義田以歲所

瓊山縣志

卷十七

金石

三

大餘者分給族人性至孝遠事祖父暨繼母皆曲得歡心考遘疾禱祈潔齋者累月兄弟之子擇其秀者爲納國學其可任以事者給資俾營生計兩室姪早卒遺一男二女各予百金爲讀書婚嫁費其篤內行皆此類也公性方嚴樂易接人以禮侃侃正論終夜無倦色足跡不入官府當事以公專廷訪者乃一往終無所干預也教諸子以耕讀爲本訓典以文章職業上報國恩敬守庭訓力學如寒素有以揚公之志俾其後嗣有所稟承力行而善俗者永有艾也公以子典官誥封奉政大夫翰林編修加四級生於康熙五十二年七月九日卒於乾隆四十九年八月十日男琮廩貢生卽用教諭典乙

酉科拔貢舉人已丑科進士官翰林院編修四庫全書
纂修兼分校官三通館纂修官班廩貢生庚子舉人翁
源縣教諭玠廩生環女三長適分發訓導署西寧縣教
諭陳模次適王德昭次幼未字孫男九以信廩貢以哲
以端以亨以猷以懋以筠以嘉以楫女孫五長適庠生
毛用晟次適王協恭次適庠生馮鳴皋次皆幼未字曾
孫男一厥嗣輩以乾隆五十二年二月初九日葬六斗
羣之原以狀來乞銘銘曰淵乎吳翁孝友敬恭克式于宗
克昌其躬鬱鬱杉松瓊岡是崇訓睦以雍勗孝以忠篤
為祥風子孫攸同

日講起居注官文淵閣直閣事詹事府詹事兼翰林院

瓊山縣志

卷十七

金石

三

侍讀學士大興翁方綱撰並書

日講起居注官翰林院侍讀學士嘉定曹仁虎篆蓋

乾隆五十二年丁未仲春月上浣日立

歟命鎮守廣東雷瓊水陸等處地方總鎮都督府原任籍

貫到任年分題名錄石碑

黃思順治四年任
循定瓊州

李棲鳳順治四年任
循定瓊州

高進庫陝西宜川縣人
九年任

黃應傑陝西榆林衛人
康熙三年任

崔世榮鹽監旗人
七年任

佟國卿正藍旗人
十一年任

劉成龍 鑲藍旗人二十一年任

吳啟爵 廣東潮州海陽人二十五年任

唐光堯 遼東撫順人三十二年任

吳啟龍 浙江會稽人四十年任

范時捷 遼東瀋陽人四十二年任

孫成龍 江南通州人四十八年任

何國雲 江西進賢人五十一年任

任重遠 陝西寧夏衛人五十五年任

張耀祖 陝西西安府人

黃際瑞 福建泉州府晉江人雍正二年任

黃助 福建汀州府人三年任

瓊山縣志

卷十七

金石

三

施廷專 正黃旗人五年任

李順 河南唐縣人七年任

武進陞 山西平陽府鄉寧縣人

黃有才 福建泉州府同安縣人八年任

黃仕俊 福建長泰縣人十三年任十五年

胡貴 福建泉州府同安人十四年任

林朝翼 福建人十七年甫經到任

黃正綱 福州府羅源縣人十八年任二十三年

解遜 山西平湖府右玉縣人二十四年任

張國標 福建汀州府連城人二十七年任

裴鏡 湖廣常德府武陵人三十年任卽年

甘國寶 福建古田縣人 三十一年任

葉相德 浙江湖州府歸安縣人 三十一年任

林呂韜 福建漳州府詔安縣人 三十二年任

李耀先 泉州府同安縣人 三十六年任

瑞衡 正黃旗人 三十七年任 四十六年

李銓 河南歸德府雲城縣人 四十七年 四十九年 告病解任 由武進士侍衛

葉至剛 廣東東莞縣人 四十九年任

陸廷柱 武進士 藍翎侍衛 江南通州人 五十五年 卽年革職

蒼保 白旗漢軍 五十五年任 六十年

徐忠 浙江寧波府鎮海人 五十九年

覺羅西密揚阿 正紅旗滿洲人 元年任 十年 換調 由世管佐領

瓊山縣志

卷十七

金石

三

富蘭 黃旗滿洲人 十年任

馬應國 四川成都縣人 十四年任 十六年

洪鼈 浙江寧波府人 十六年任

李增階 福建泉州府同安縣人 由武生 二十三年任 道光元年 升廣東提督

熊廷揚 浙江黃巖縣人 由行伍

張清亮 廣東廣州府香山縣人 由行伍

張兆麟 江南通州人 由丙午申武

孫得發 福建閩縣人 由世襲雲騎尉

黃建功 福建羅源縣人 由行伍 十二年任 本年

莊芳機 漳州府平和縣人 由行伍

陳步雲 浙江温州府瑞安縣人 由行伍 十四年 四月到任

謝得彰

福建詔安人 出 行 伍 十四年十月到任

鮑起豹

安徽六安縣人 世襲雲騎尉十六年任二十六年告終 養 同 籍

黃慶元

潮州南澳嶼人 世襲雲騎尉 二十六年十一月到任

吳元猷

瓊山縣人 咸豐元年七月署任 四年二月實任 升 廣東水師提督

黃開廣

廣東順德人 同治元年任

王鵬年

瓊山縣人 二年八月任

黃廷彪

廣東順德縣人 出軍功 光緒三年六月到任 四年正月卸事

殷錫茂

江蘇合肥縣人 出軍功 四年十二月到任 五年十一月卸事

彭玉

高州府吳川縣人 出軍功 五年十月署任 六年實任 十年二月卸事

賴鎮邊

廣東東莞人 由行伍 十一年十月到任

滕嗣賢

湖南寧慶府邵陽人 由行伍 十七年八月到任

瓊山縣志

卷十七

金石

七

乾隆五十二年歲次丁未十二月吉日建石

案碑高八尺濶一尺八寸分十三行每行分六層題名

籍貫到任年分各大字籍貫小字額篆題名錄三字乾

隆五十二年為李至剛任碑建此時是李所刻考碑中

李棲鳳職官志鳳作鵬李至剛作王道光十三年任蔡

芳機府縣志俱無其名是其遺漏

浮粟泉三字石刻

乾隆五十八年六月重修郡守葉汝蘭書

案碑橫嵌泉上長三尺餘濶一尺字大八寸年號在前

小字名在後亦小字葉太守重修東坡書院浮粟泉名

勝並刻此額

泉飛藻思雲散流襟八篆字石刻

旁有汪屋篆無年月是同修浮粟泉時所立

重建關帝廟碑記 正字額

粵稽堯典贊帝堯之德曰帝光天之下至於海隅出日萬邦黎獻罔不率俾故孔子稱堯之德曰惟天爲大惟堯則之誠以帝堯立人之極凡萬古之帝王師相皆當法堯之克明峻德是以中庸云惟天下至聖天之所覆地之所載日月所照霜露所墜舟車所至人力所遠莫不尊親故曰配天惟關帝文德武功超軼千古精忠浩氣昭著人間與堯典所稱中庸所紀若合符節今天下四海九州歎奉諭旨春秋崇祀與孔廟等而天下凡人

瓊山縣志

卷十七

金石

三

迹所至白叟黃童未有不敬關帝者此又莫不尊親之明驗瓊州舊有帝廟日以傾頽鎮道朔望展拜慨然興嘆維時張郡守創議興修捐廉倡首鳩工庀材工程頗鉅又得郭守戎實心經理不數月而落成廟貌聿新益見聲靈赫濯從此瓊海之濱懋昭顯佑民安物阜使皇圖鞏固於萬斯年受茲景福豈又忘其所自乎爰書其事而勒石以垂不朽

案碑無撰文姓名記中言張郡守名增郭守戎名廷清嘉慶十一年歲次丁卯季夏月立

新造白沙東西橋記

距郡城東北十里許有白沙村村之南有河河有渡河

之南有溪汜二適當往來之衝淺不容舟潮水漲入往
往不能行當夏秋瀾漫隆冬海寒涉者每以爲病學齋
編修太夫人陳太宜人出自白沙少悉其苦數十年來
嘗有建橋利濟之念而事未果乾隆丙午學齋以下外
艱旋籍一旦太宜人召而告之曰白沙之欲建橋予存
此志久矣今出所積白金若干爾兄弟其爲我成其事
學齋欣然承命即日躬親相視鳩工伐石偕弟學博惺
齋朝夕督率不辭其勞經始于丙午二月閱十月而雙
橋落成東橋長十二丈寬九尺橋門五西橋長七十餘
丈寬如之橋門三十一計費白金二千有奇鄉之人感
其德謀勒石以誌屬學齋季弟文侯請其名與詛於余

瓊山縣志

卷十七

金石

三

名之曰東西新橋昔蘇文忠之在惠也惠人造東西新
橋公捐犀帶以助而予由史夫人亦助以大內所賜金
錢數千故先生詩有歎我捐犀帶及寶錢出金閨之句
至今述爲美談今斯橋之建太宜人獨任其事其功大
其利溥其視史夫人所助更何如也橋成閱十年矣學
齋惺齋皆赴修文之召矣余重太宜人利及鄉人而悲
學齋惺齋之不能久存也爰書厥年月勒學齋昆弟之
名於左庶幾後之履斯橋者得以攷其顛末焉

截選知縣改國子監學正前饒平縣學訓導王時字撰
己丑進士翰林院編修吳興庚子舉人翁源縣教諭吳
班督造恩貢生試用直隸州州判吳玟書丹

嘉慶十二年歲次丁卯孟冬月吉旦 白沙坊立

皇清贈封安人吳母黃太安人墓誌銘

太安人姓黃氏郡內處士諱廷棟公長女候選州同儒林郎翰林院編修左峯公之元配也生而幽閒貞靜年十九于歸遠事舅姑朝議大夫多五公張恭人凡巾櫛盤匱滌澹之奉必誠必敬務得堂上歡而妯娌諧睦畢生無詬誶聲故尊嫜咸喜曰諸婦俱賢昌之漸乎其相左峯公也勤庀內政不數年家道充裕居常井臼操持一切巖齋祭享榛栗餽遺之儀莫不雍容中禮有鍾郝風焉左峯公念其姿薄弱好清閑因置側室太宜人欣然有逮下之心不謂能夢未卜而左峯竟賫志以歿矣

瓊山縣志

卷十七

金石

甲

太安性慈惠於從子姪無不撫恤如已出故西峰公仲子太史學齋公請封安人以報之嗣君惺齋乃西峯公三子也生而倜儻孝友恭敬族黨交稱左峯公將臨終命爲嗣太安人朝夕教誨常告曰吾素期汝子姪成人况爲吾夫後者乎而惺齋亦善養志積學砥行以蘄顯揚歲試補弟子員冠其軍科試一等食餼繼分發教諭署高州信宜縣教諭雷白縣訓導日與諸生講明立身行已尊君親上之大節效西峯公任博羅時捐膏火以助有志之士文風蒸蒸日上變庚子惺齋同余舉於鄉此固家學使然亦所得於太安人之誨者居多甲辰余成進士惺齋以學齋分校禮闈迴避計偕在都選授翁源

教諭兼程赴任得黃痘之病秋以西峯公諱同籍太安人見其形神消耗力爲調護若禱禳三月而痊丁未竟以舊恙復發而卒太安人哭之慟口天喪我也樂極生憂我未之有憂多樂少我命則然安之而已第禮不夙停親棺孫爾勿爲堪輿所惑澄邑山頭嶺之地頗爲穩當蓋決意行之太安人於養生喪死慎重如此太安人居恒常言曰前人之積善如點燈隨點隨益後人之繼善如添油愈添愈八孫爾先世累代積善旣獲報於學齋吾於汝父是期所以告志清操事事讓人事事勤謹者欲爲汝父培植以寧爾祖考也汝父明博一第榮一階庶足酬先人於萬一矣孫等汝其善繼之以

步武先大夫乎長孫哲開命援貢成均循授太常寺博士次孫亨亦由附貢生就鹽政大使職莫非太安人之教澤致之也至於愛人節用周窮濟困諸端懿不勝舉蓋婦德母範無愧於古者矣爰爲誌其幽并系以銘曰於虛矣母其善事尊章也惟孝其善視子孫也惟教其相夫子而光前裕後也惟德焜耀婦道母道是則攸綿綿食報龍章鳳詔

賜進士出身國子監學正改授南陽府桐柏縣知縣加二級紀錄二次年世姪李琦拜撰并書

皇清誥授奉政大夫潼關撫民同知蘭齋吳公墓誌銘
嘉慶戊辰年四月三十三原任陝西潼關撫民同知山

西直隸隰州知州汾州張蘭鎮同知蘭齋吳公諱瑾字
蓋遊官十年歸來千里家居侍養未兩旬而實志以歿
於虞桂以二十年前賓主之誼曾延課其令嗣聚晤者
人之又鄰桑梓悉其言行綦詳茲屬誌其墓余雖不文
義烏容辭也公號蘭齋居長自少厚重不佻髫齡時便
有老成度朝議祖多五公於諸孫中尤鍾愛之府試冠
軍入邑庠屢赴鄉試不第授劍府參軍分發甘肅試用
以道僻音問難通眷戀慈闈因告病回籍持家政踵理
舊業才優億中家業視前人增倍徙焉侍親間視無少
間怡色柔聲親愛亦愛親敬亦敬嘉穀珍品時進不敢
先嘗出面反告必稟命諸事與兩昆季商酌而行合饗

瓊山縣志

卷十七

金石

聖

數十年殮必共食一堂之上孝友雍和其事胞伯西峯
公左峯公如父待從兄弟子姪如同胞從姪被難遠行
多助資其於親黨窘急者解囊周恤無吝吝人皆稱其
長厚蓋天性然也府憲葉公會屬重建龍王廟及蘇泉
書院輒捐數百金又添金添建大慈寺拜亭甬道左右
禪室先是郡西南宋橋爲瓊七縣必由大路建橋以度
行人西關外長途曠坡肩挑絡繹每逢夏月頗渴無由
解置業交真如寺僧收租於寺前種大樹建小屋設茶
水以濟行人又置園地一片爲寺中香燈之資凡改建
府縣文廟及各寺院莫不踴躍捐貲以襄美舉其建祖
祠修祖墳置祭產祭品咸竭力欣助以成其奉旨棟磬

發陝西以同知候補也西省小醜竊發軍書旁午而辦
軍餉修寨堡馳驅戎馬賢勞備著迨委署潼關地爲西
省通衢差事往來無寧暑而從容措應裕如時值大兵
凱旋所需口糧無公項可支墊出銀二千餘兩以給之
大憲以陝西人員擁滯奉請疏還奉文改調山西歷任
潔已愛民百姓有菩薩之稱沾甘雨而仰清風者蓋奉
之如父母焉告養言旋板輿侍奉未幾時遽先八旬老
母而溘逝公其抱痛於九泉哉然而兩嗣俱長成克家
方大有所樹立却可以無憾矣并系之以銘曰惟蘭齋
公磊磊居衷事親藹藹愛弟雍雍接人以禮居官以忠
見義惟勇待下惟宏於虜蘭齋裕後維崇

敕授修職郎署從化縣教諭加一級候補教諭己酉科
拔貢粟水林桂拜撰並書

嘉慶十四年歲次己巳夏月之吉立

重修西天廟碑記

南離之區珠崖之地山川清淑之氣磅礴鬱積而起者
代有名賢要其垂功烈光俎豆百世馨香者卓卓若邱
文莊海忠介而外於西天大士爲尤著焉公臨人也登
正統丁卯賢書出宰桐鄉政治卓異成化甲申告假旋里
卒於瓊海之上英靈顯赫凡舟楫往來遇險遂呼靈氣
勃勃都人士乃於海門之西立廟而尸祝焉蓋公之經
濟見於桐鄉者迺其小試而靈爽依乎廟宇者特其造

端也昔蘇長公作潮州韓文公碑曰公之精神在天
如水在地中潮人私之譬如掘井得泉而泉專在於
此理哉吾以爲公亦然公之廟在海安臨邑俱肖像以
祀而此則自隆慶以來數百餘年人人祝之者常如
日晨鐘暮鼓時切景行乾隆辛巳里人林君振瓊殿宇
傾頽虔集紳士商民重建而更張之有左堂伊公爲之
記追日久年湮不無朽蠹思繼起之有功紹前徽於勿
替爰有梁國祥等居同梓里沐神恩於有素迹溷澤畔
念報德而無由歲己巳誠集同人踴躍醵金材木之壞
也備堅石以易之神階之空也築兩廊以接之龍虎井
而更爲日月池自廟宇以及門臺亭閣煥然一新蓋已

三年矣旣落成因以序問于余余曰公之德及於海濱
者凡行商居賈人入被之而保障平洋則吾瓊尤賴焉
余屢經渡海登廟堂而拜謁之佩公之德甚多故不辭
不文因勒之石爲記當道大人紳士商民之樂善好義
尚德崇賢者以垂不朽云

特補功臣館分校原任韶州府英德縣教諭加一級拔
貢梁毓秀拜撰

嘉慶十七年歲次壬申秋月立

立建風神廟碑

高五尺六寸濶二尺分十九行行四十九
字額正字大四寸

大凡天地之用莫貴於氣氣之用莫貴於風風之起乎
一方而達乎四海不疾而速不行而至陽凝而不施陰

幽而不化風一振而凝者以散幽者以化溥暢萬物發
輝天德而不有其功非天下之聖神其孰如是故周禮
大宗伯祀天下之三神觀師以禋燎祭之焉今天下亦
莫不有祀然其於中土除潔土而爲之壇與山川雷雨
同壇以達天地之氣爲民祈報焉耳矣至於交廣之間
陽泄而陰蒸氣殊而風亦異故祀風亦甚謹瓊居大海
中尤驚濤日夕所鼓盪風爲水母恒換潮生且州在海
南南多陽風生於陽之極夏秋間往往爲颶颶風作則
破屋拔木傷禾稼損牛馬折榑輒碎賈舶民滋懼焉故
又云懼於瓊爲甚夫氣之鼓也恒不可卒止而天地之
憾又必有神以平之則所戢天吳之暴怒禁海若之馮

陵者非神疇恃余以嘉慶二十二年承天子命觀察雷
瓊渡海之日水波不興神颺送帆仰聖天子威靈統及
天地小臣實受其賜既受事展謁秩祀拜風神廟於郡
東門之外泮隘廡陋不稱此郡所以事神之意會改文
昌於桂林爰卽文昌舊宮飾以丹牒塗以髹漆圩之聖
之旣潔旣除擇日告神而述之昔崇岡面平野庭宇壇
爽位居良維良者心也義成始終所以事而祈福者儻
神其樂之因爲享神之詩曰坎坎乎繫鼓僊僊乎屢舞
劍佩兮陸離穆穆傳傳兮堂下酌桂酒兮椒漿進肴蒸兮
蘭芳望閭闔兮九重靈之來兮雍容乘六氣兮導陰陽
御瑶軫兮靜八荒謂天吳兮鼓瑟謂海若兮頓節條石

鳴兮遂生物不疵兮遂成黍與與兮如雲歲穰穰兮民
欣湛清酌兮若玉英薑神靈兮樂未央

賜進士出身欽命分巡雷瓊等處兵備道兼管水利陽
湖左輔拜撰並書

賜進士出身瓊州府知府史祐瓊山縣知縣李景沆

嘉慶二十三年歲次戊寅孟夏月穀旦

重建瓊臺書院碑記

嘉慶二十三年冬余奉命分巡雷瓊道明年四月往視
事揚帆渡海恬波不驚人其境見其土樸而能文其民
謹愿而不好鬪風氣近古心甚嘉之竊念觀風整俗使
者之責也暇日召其縉紳耆老於庭而告之曰瓊地廣

瓊山縣志

卷十七

金石

碑

袤千餘里經涉重溟物產饒衍與郡內郡會埒自宋以
來厥有聞人洎我本朝深仁厚澤化被無外士之懷抱
瑰特聲稱卓越撥巍科而膺顯仕者不絕也夫欲齊民
俗者自端士習始欲導士習者必自書院始曷思有以
舉之愈肅而稱曰瓊有書院曰瓊臺歷年久遠棟宇朽
蝕不可以居逞者督學傅公以試事蒞茲士捐廉銀四
百爲修葺費尚未及舉前觀察左公銳意任事尋又遷
去今公復有俞瓊人士之幸也夫重學校釐文體學使
者之責也若設書院爲敬業樂羣所實守土者之責乃
學使者先守土者以勤其事爲多士勗意甚厚也余承
左公後責曷敢辭乃以前項四百爲之倡於是同官率

分俸助之士之慕義者捐輸若恐後時二十五年七月始作十二月落成且請余文以記蓋擴舊址易戶向凡爲門若干重爲堂若干楹爲齋會若干栢庖滷之所咸具建奎宿之閣於后左下祀宋周程張朱五夫子與其鄉先賢邱海二公功速而事不煩於是歎向之所心嘉者爲不妄也夫士莫先於立志立志之方在乎善學人苟營情於利祿之途鹵莽滅裂視五經若贅癘束三傳於高閣日取兔園冊子咕嗶伊吾而欲弋獲科目之榮淺矣縱科目可以弋獲而欲從事於聖賢之道得門而躋堂是猶壁孔而欲觀日月之全光也是猶斷港絕潢而欲趨至於海也吾願諸生肄業於茲者屢飶乎詩書

之圃優游乎仁義之園被服儒先遵循師訓必使處而德行見重於里閭出則經濟見稱於當世斯爲不負使者之厚望焉若夫修鹿洞之學規紹紫陽之教澤斯又掌教者之責而使者之所企也是役也費計五千金董其事者郡人官獨司其成云

賜進士出身分巡雷瓊兵備道仁和費丙章撰

嘉慶二十五年歲次庚辰冬月立

海忠介公書管子牧民篇石刻

正書碑六片一千七百零六字

莫紹熹跋忠介公書管子牧民篇公爲人剛正一飯之頃不忘君民其忠貞貫乎金石聲名昭乎日月不獨吾瓊人士仰慕而已公之書法鮮有傳者余獲之京師責

肆各家收藏印章俱在是公真迹無疑欲刻石本俾廣
流傳偶與同鄉商及眾咸踴躍相與出資采石摹刻適
此時移建瓊臺書院築之於壁永垂不朽

案篇後書隆慶庚午春正月公書致庚午爲隆慶四年
公任南京巡撫正月開吳淞江又開白茆河公事紛繁
猶能正書牧民篇是其精力過人已可想見公書剛勁
如其爲人允可寶貴

海忠介公上呂豫所書

草字

今年春公當會試天下士諒公以公道自持必不以私
徇太獄想太獄亦以公道自守必不以私干公也惟公
亮之

瓊山縣志

卷十七

金石

吳

豫所呂老先生

海瑞載頓首

餘慎

莫紹喜跋吾鄉忠介公剛正之氣無往不與俱此書蓋
明神宗初年張居正當國其子嗣修將就試南宮物議
沸騰公以諷大學士呂調陽者太嶽則居正豫所則調
陽也僅五十七字耳而簡嚴審直不激不隨與顏魯公
爭坐位書同一忠義氣象書法亦道健洵足追配古人
公手迹不少概見余辛未遊蘇門得之今攜歸里入石
以永其傳後之覽者庶幾有所感發而興起焉

案萬歷元年忠介公在籍養親撫按各科道御史交章
薦公公以母老不出山而其心猶不忘時事此書義正
詞嚴以公道望其有虛嫻而多諷簡而能該是詞翰之

最高者不獨書法之可傳也嘉慶二十四年刻於羊城
二十五年冬築於瓊臺書院先賢祠壁間

海忠介公廟碑

在官隆一里青草村西

古人興利以水利爲大崔瑗宰汲開澮以灌民田鄭渾
治沛築陂以利稻田召信臣之通溝范滂之儲木鄧農
之興鴻都陂李吉甫築平津堰皆能興利一時澤及百
世民之報德沒世不忘然此皆仕宦時所爲至致仕而
歸未聞廣興水利如在官之日者豈其力有不能志有
不逮哉噫此吾鄉海忠介公所以不可及也公撫吳時
塞吳淞江口開白茆河三月成功其利民之政卓卓大
著世所共知吳人春秋祭之至今勿替而於告養在籍

瓊山縣志

卷十七

金石

四

時凡清丈田畝諸事有益於地方者無不爲當道言之
觀其上唐敬亭太守諸書指陳農田利弊言詳且盡觀
其開官隆田溝自昌華橋長城前至雞頭墩逶迤十餘
里灌田千百頃民到於今受其賜豈非士大夫居一鄉
則益一鄉居天下則益天下之善政哉然公之廣興水
利有益於天下者人盡知之至有益於鄉里者人不能
盡知之此吾鄉官隆一里之建廟所以至今始創也且
今日去公之世三百有餘年遺澤之在人亦三百有餘
年何以前人利其利而忘其利後人利其利而不忘其
利豈民情有今昔之殊哉當時則忘沒世則恩勢使然
也况今日人情日變此疆彼界有利於己者開之不利

於已者塞之在所不免今考公遺制田原猶是流水依然及迨遠尋源其上流已有時通塞不能盡如當日開浚之舊倘再經數傳安保能盡如今日哉今建專祠報公盛德俾官隆之人咸知田溝之利出公手創非人人所自私而不敢阻塞公在天之靈實憑式之庶人心知所畏敬而享其利於無窮也創建者誰吾族邦宏福憲俊歛諸伯叔於例得書名勒諸貞珉用垂不朽同邑後學王承烈拜撰並書

嘉慶二十五年歲次庚辰秋月立石

重修彌勒殿碑記

天下名山勝景皆有招提蘭若以踞其勝以成一方之

瓊山縣志

卷十七

金石

五

巨觀然其增華繼美必內有在持外有檀越以潤澤之乃是以流傳名於不朽瓊舊有白衣菴者地踞城南之勝前環幽水後枕高岡屏面百雉之雄塔呈七級之秀院宇精潔佛像莊嚴洵爲一郡首刹也考其志乘擬於有明郡伯倪公建在清惠亭之右迨我國初道憲戚公鎮憲高公府憲王公遷建於城南之外改其額曰圓通寺至嘉慶丁巳寺中蓮花並蒂呈祥總戎西公道憲俞公府憲葉公踵寺游賞因建景遠亭於寺後並集紳士商民葺修大雄寶殿山門墻垣丙子蓮又開並蒂應瑞中府常公重修亭而額曰瑞蓮軒丁丑余膺簡命來宰瓊山適逢道憲左公府憲史公遷建文昌閣於寺左春

秋祀典每集於茲得備遊觀因見彌勒殿自康熙癸未
年經前兩任王公劉公協力重修歷今百有餘歲住持
僧契誠時抱風雨飄搖之憂向余叩爲護法余維舉墜
與廢亦守土者之責既有爲之前亦有爲之後况乃瓊
臺之首刹也哉隨卽捐俸并集同寅紳士商民共成厥
事卜吉興工規模比前更加壯麗焉工告竣計費白金
三百有奇皆僧獨負其事今余大都僧乞余言以記諸
石爰備書顛末俾後來論世者得所考據亦且相與增
華繼美越萬古而益彰云爾是爲記

敕授文林郎知瓊山縣事前署海防軍民府加十級紀
錄十次壽光李景沆拜撰

瓊山縣志

卷十七

金石

至

署瓊州總鎮王

署海口協鎮劉

瓊山左堂沈

署雷瓊道洪

署儋州知州錢

瓊山右堂尹

瓊州知府史

澄邁知縣黃

金花村溫鴻基拜

書

道光二年歲在壬午桂月吉

住持僧意真誠立石

案記中鎮憲高名進庫府憲王名元士總戎西名密陽
阿道憲俞名廷垣府憲葉名汝蘭道憲左名輔府憲史
名祐惟前兩任王公劉公道憲戚署總鎮王雷瓊道洪
協鎮劉右堂尹府縣志俱不載

敕授修職郎電白縣教諭慎齋周先生墓誌銘

先生諱家修字獻甫號慎齋大學士秀梅公之二十四

世孫也祖厚而公端方勤儉壽逾古稀鄉鄰親友咸贈
德言父長山公居心恬淡教子義方以先生貴賜贈如
其官先生爲長山公長子幼而岐嶷長而英雋嶄然頭
角識者器之甫弱冠丁長山公艱必誠必慎以當大事
服闋應童子試補弟子員蜚聲黌序壬午秋闈受知於
明府方宗工以首卷特薦定魁四日因二場微有不檢
署之副車雖不無抑鬱而文名由此日噪矣先生爲人
重然諾寡言語待弱弟以友睦宗族以恕子姪有過者
從容開導未嘗疾聲遽色蓋其素行端莊得之學養者
深無流俗詭隨之習和平溫厚坦然浪畦吟之見且勤
於義舉修合族宗祠祔然力任其事贖金出息權其子

瓊山縣志

卷十七

金石

五

母以劔建奎光閣使族人得肄業其中迄今聯翩鵲起
者皆先生有以成之也方先生之中副車也都人士互
相引重咸以爲雲雨蛟龍終非池中之物苟其再濟孟明
之舟重奮曹沫之劔則乘風破浪斬將搴旗固自易易
乃先生則曰士各有志豈必步蟾宮題雁塔矜矜以文
字見長哉念先君康強早世服事日淺竊自傷矣今慈
母在堂融融洩洩致足樂也余決不以彼易此於是盡
菽水之歡極甘旨之奉左右就養罔須臾離戊戌夏蔡
太孺人寢疾先生躬侍湯藥衣不解帶及卒哀毀痛哭
至於骨立蓋其天性純篤然也晚年銳意劖垂求其可
繼克勤克儉苟合苟完雖不自以爲富有然綽綽平若

與曩者異嗟乎雕蟲末技也君子務其大者遠者耳嘗
見世俗雪屑螢火備歷艱辛雲路鵬程莫酬萬一甚至
窮愁落寞無以表見於時承先教後亦無以克自樹立
爲宗族光外重而內輕近世所謂士大夫者往往若是
歎息久之如先生者不誠加人一等歟先生以明經請
選得授一官未及赴任以乾隆壬子年十一月二十四
日卒年六十八嘉慶甲子年三月戊辰日葬於官橋溝
之原德配蔡孺人歲貢生任仁化縣訓導諱十朋公次
女次配何氏有子一曰景雲職府知事女三長適定邑
監生王建梁次適澄邑生員陳儉三適會邑監生張廷
併孫二尚幼景雲承先志不墜家聲而諸孫次第王立

瓊山縣志

卷十七

金石

五

興宗繩武可拭目待先生沒十九年予適就西席於先
生之鄉始得詳禮家乘景仰前徽其流風遺澤猶有存
焉謹擬其持躬行己之大以誌幽宮且系以銘曰鞏洛
封兮肇岐陽圖太極兮蓮池香嗣服昭兮世澤長繼雲
錦兮煥纁緇附驥尾兮名益彰竭島私兮養無方挾洪
濤兮氣軒昂沈極星兮歛光芒覓佳城兮鬱蒼蒼甬先
生兮真篤蘭有秀兮桂有芳食舊德兮不敢忘朋奕葉
兮繼而昌

敷授儒林郎徵召孝廉方正辛酉科舉人同邑王承烈
拜撰並書

道光二年歲次壬午秋月立

重建瓊山雁峯書院誌

昔子產之治鄭也曰太上以德服民其次莫如猛古今之稱循吏者莫不以子產爲師法蓋其殖田疇誨子弟以養以教然後父母斯民之責可以無負予自需次粵東權篆十餘邑每攝一篆旣以勸農桑敦教化爲本務雖才力不逮古人而區區此心亦可以共喻諸爾百姓也粵稽地志瓊環大洋土沃民饒居南離之極人文蔚起如前代邱文莊公海忠介公嶽韻風流興起百世爾多士耳濡目染有不厚自期許者非情也况逢周道寤呂府憲振綱飭紀興賢育才爾多士食德飲和有不自濯磨者又非情也考瓊郡十三屬各有書院而瓊山

瓊山縣志

卷十七

金石

書

獨無適有雁峯社學奉道憲行查在案地本瓊庠遺址面對雁塔三元峯前邱文莊公讀書於此羣雁來集著記以紀其事乾隆三十九年八家紳士劄爲雁峯社學今已學舍荒蕪若垣薛壁予因稟請道憲改爲書院憲曰可於是廢者興之狹者闢之并以瓊山雁峯書院顏其額雅不沒前人美意故曰重建云耳然而經費浩繁工程鉅大選擇拔貢生王公天佑董理其事經營圖度晝夕勞勞又幸諸君子鼎力捐贊予不逮衆擎易舉兩月告成繼自今延名師設膏火俾諸生藏焉修焉息焉游焉處焉正士出爲純臣以仰答聖天子壽考作人儲才育德之至意是豈惟生斯土者之光宰斯土者亦

與有榮施也是爲序

知瓊山縣事楚南于學質撰并書

道光三年歲次癸未 月 立

旌表節孝曾太姻母郭太孺人墓誌銘

太孺人郭氏國學瓊琪次女母岸有績胞妹而曾履廉公之次媳魁文之德配也生而婉婉長益端靜進止多合禮法隱然有祖孟風及其于歸曾氏也雞鳴戒且相敬如賓孝以事尊嫡謙以接嫡媵和以睦族黨罔有內外咸無間言年二十早喪所天孺人哀慟欲絕誓以身殉其舅姑妯而慰之曰婦人之義無夫則守子無子則守可嗣之孤汝獨不爲立後計耶孺人聞之隱忍令與

瓊山縣志

卷十七

金石

五

猶子且夕相依備極恩勤教之成立而靜處一室閱風霜易寒暑茹荼集蓼之苦獨受之而獨知之蓋其天性蘊結於內而一往凜凜之氣流貫於始終而不渝故松柏貞操歷數十年如一日嗚呼世所稱巾幗之賢亦惟是德懋珩璜儀修蘭蕙克勤克儉無慙內職而已若夫千秋大節旣著美於生前百尺空碑更遺芳於身後如孺人者不誠卓卓可紀哉孺人以嘉慶辛未冬終於內寢享年六十有四歲戊寅恭逢督憲阮雲臺修廣東通志檄各府州縣有孝子順孫義夫節婦事關風教俱得確查轉詳時鄰族紳士以孺人節孝聯名公呈蒙部恩准資給建坊以示旌表其姪曰誠又以志銘請余忝在

世親不敢以不文辭因得叙其梗槩焉銘曰鬱鬱孤松
歷飽風霜皎皎賢母獨守綱常神明內朗淑慎外彰恒
貞之吉潛德之光彤廷表節國史揚芳名留珉石靈集
幽堂牛眠兆瑞龍耳呈祥徽音永嗣天地人長
敕授儒林郎孝廉方正辛酉科舉人姻世姪王承烈頓
首拜撰并書丹

道光三年歲次癸未吉日立

重刻長樂居序

瓊臺王處士才隱居郡城之東南不慕榮利惟順天時
因地利治產營生日以繼日久之田連阡陌家累千金
廼卽其隙地闢而爲園修竹美木奇花異果森然雜植

瓊山縣志

卷十七

金石

五

乎其中構軒一區扁曰適意軒前鑿地爲池魴鯉鳧雁
游泳上下芟芟芟荷掩映遠邇池之上結茅爲亭扁曰
關暑亭西南鑿山引泉做晉人遺製爲曲水客至則流
觴其中以爲樂因合而名曰長樂居其子冕以賓貢上
京師旣請其鄉先生少宗伯邱公爲之記士林羨慕之
者又作詩歌以揚揄之詩旣盈卷廼求序於余客有見
而疑之者曰憂樂二者皆人之情自天子以至庶人未
有恒樂而無憂者也孟子曰堯以不得舜爲已憂舜以
不得禹臯陶爲已憂天子固不能恒樂矣范文正曰居
廟堂之上則憂其民處江湖之遠則憂其君卿大夫亦
不能長樂矣矧爲士庶者百畝不易饑寒切身安得而

長樂乎予曰不然天子卿大夫之任重故其所憂者大
至於士庶人之所憂者一家而已今處士才廩有餘粟
庫有餘財而啼饑號寒之聲不接於耳日出而作日入
而息而叫囂墜突之吏不及於門理亂不知黜陟不聞
而人情世道之變能不關乎心惟日披襟散髮逍遙於
園池之間仰而挹佳木之繁蔭俯而聽山泉之滴瀝或
摘花浸酒或舉網擊鮮醉而眠醒而嬉自幼至老無日
而不樂不謂之長樂可乎等而上之則可尋仲尼顏子
之樂矣乃慨以孟子文正之言是知圖南之舉而不知
斥鷃鷄之樂也願不失其類耶客輒然而笑曰有是哉
予遂書此以爲序

瓊山縣志

卷十七

金石

五

明成化二十年甲辰春初吉

賜進士出身嘉議大夫南京太常寺卿掌國子監祭酒
事前翰林院修撰國子諭德經筵講官同修國史安成
劉宣撰

道光四年歲次甲申夏月重勒大石

重修文峯塔碑記

瓊州府城西南八里許丁村舊有文峰塔位宅丁方離
明象也歲久傾圮康熙甲申賈太守棠於遺址植表以
助文明其明年乙酉郡中擢科者六人由是重建新塔
戊子瓊山令王贊於塔前復立文昌祠厥後一修於乾隆
丙寅瓊山令楊宗秉再修於癸巳邑紳吳仕和等咸

有徵應載有郡邑志乘故郡士僉謂此塔興廢關繫合郡文風盛衰其言有驗今距再修之歲又五十三年矣風雨摧剝日就殘闕郡士屢欲新之而未果也本年正值乙酉鄉試余商之府學教授張衍基訓導王紹曾集邑紳符魁泰亟謀修復官捐資爲倡而邦人士樂助工用相與有成肇工於四月二十日越某日告竣人和旣彰地利斯得崇祠傑構煥然一新矣旣訖事郡人請予文以紀緣起余維瓊郡當炎裔在洪波浩瀚之中爲南溟竒甸朱明啓朗精氣上華其扶輿旁薄之氣蔚爲人文理學氣節之士先後焜耀史冊而說者以全郡形勢四州環島中高外坦濱海之地益趨平衍不立崇基以

瓊山縣志

卷十七

金石

五

鈐束之則地脈泄散文氣因之不振茲塔修建歷有嘉徵操券不爽雖形家言儒者弗尚然古人建國首重辨方而相陰陽卜瀝澗同見采於孔氏列於詩書則其說亦未盡誣也且夫吾人爲學若建塔然學有本原堅貞篤實一塔之厚其登址也循序漸進不凌不躐一塔之等其階級也由是下學而上達希賢希聖以馴致乎登峯造極之詣其與飛費流聖繼長增高薄清景而凌絕頂者更何以異然則塔之有繫於人文而郡士之仰止斯塔也亦宜雖然余之有望於郡士者則尤願其稟山川清淑之氣發日月沐浴之英忠信仁義以固其基文章政事以崇其業功高而無傾節峻而不扳將見人傑

地靈英賢挺特處則爲坊表之君子出則爲柱石之名
臣以上彰聖天子嚮明繼照聲教南暨之盛軌又豈區
區科第之榮侈言地利而已哉昔東漢郃陽令曹全開
南門望華嶽使學者各獲人爵之報刊石紀辭垂諸奕
世則是舉也允當勒之貞珉俾後之人知有基勿壞勤
修以繼前美不亦善乎所有捐資姓氏出入支銷各數
詳載碑陰茲不具著

賜進士出身特授瓊州府知府陽湖呂子班撰並書

道光五年歲次乙酉夏五月立

重增瓊臺書院膏火碑

篆額

天地之生才無盡海外每毓英裔國家之造士有方學

瓊山縣志

卷十七

金石

五

申必厚儻稟惟在有牧民之責者竭力栽培盡心化導
則賢良輩出風俗丕變雖地有遐邇性判剛柔薰陶漸
染皆可訓迪使歸于中和之路願王道無近功其效恒
見於數十年之後而當其事者非有真知灼見往往憚
於煩雜置而不講則教化衰而人才亦困瓊州舊有瓊
臺書院爲閩郡生童肄業之所其有關於風化甚鉅前
道費君新橋病其湫隘巖塵增修改建擴而充之學舍
講堂煥然一新道光辛巳秋七月余奉命巡視雷瓊壬
午仲春抵任視事初下車館於書院見夫屋宇充周規
模宏敞竊喜諸生下惟有地急延師督課期於講明正
學培養士林以爲致治之本迫攷其實經費無多食益

多匱無可大可入之業以育之卽有渠渠夏屋無免每食不飽之歎無怪問字有迴車之人談經少起予之彥而士氣不振也爰捐廉銀肆百而爲倡同寅諸僚友及郡人士等皆樂分廉助貲以成其美共得銀肆千餘而發交瓊山當商生息增正課膏火六十分立定支銷章程明勒石碑詳呈兩院咨移兩司並行瓊州府及各州縣儒學備案以便稽察而垂永久經三年而後竣事歐陽子所謂感美之事須其人而後至於大備者其此類也歟余聞古者學校之教人也莫不本於人性磨揀遷革使趨於善而大其功瓊州居大海之中去省寫遠四方賓客之所不至民生不見外事安於淳樸志在溫飽

瓊山縣志

卷十七

金石

本

而無遠大之誅余自抵瓊以來爲之正其趨向發其志氣增其膏火嚴其攷課公事之暇親爲生童講明經義批評詩文以鼓舞其向善之念於是負笈來遊者日益多人競向學矣且夫學也者學之爲君臣學之爲父子兄弟內之身心性命之原外之修齊治平之理至於古今治亂損益廢置皆當講明而切究之處則爲醇儒出則爲循吏豈徒工文詞取科名爲一己之光榮而已哉是以教成一人天下收一人之用教成十人天下受十人之益推之鄉鄰族鄰由一家以及一方由一方以及一國則風俗成而人材衆矣今余與寅僚紳士經理數年克成足舉心力亦已竭矣後之君子上之秀民養成

德行文學之選與前明邱文莊海忠介公等媲美爭輝以仰副我皇上稽古右文崇儒重道之至意斯則吾之厚望也夫所有捐輸姓名出納經制另勒石碑爲記欵命廣東分巡雷瓊兵備道兼管水利驛務加二級隨帶加二級紀錄十次東魯周鳴鑾撰并書

道光五年歲次乙酉七月立

官隆開田溝記

周禮匠人爲溝洫九夫爲井井間廣深四尺謂之溝方十里爲成成間廣深八尺謂之洫溝洫者所以蓄洩而備旱潦也自商鞅裂阡陌秦政決川防而溝洫之制亡今所謂溝者殆異於古所云矣然非是則耕耨無所施

瓊山縣志

卷十七

金石

在

其力禾稼無以遂其生卽國課亦無以充其額制雖不一其有利於民則一也溝之所係顧不重哉瓊之官隆圖青草村地勢高平其田雜於墳衍者半雜於原隰者亦半非值歲潦則耕而不獲海忠介公爲之經畫於田間闢地一弓疏爲水道自樂萬至鷄頭等處遠近十餘里同資浸潤於是水源四達年穀屢豐區區寧瀟等農夫稱爲有慶居其地者實仰賴之未幾而附近農民坐爭水利閉渠塞川使涓涓細流不能下導雖大旱屢告而彼終莫之救也向之稱爲原田者幾變爲石田矣明嘉靖二十四年蒙縣批開浚又於隆慶五年蒙府委員臨勘疏通嗣後或壅或決迄無定止邇來二百餘年矣

居民往往苦之爰合鄉眾謀思所以善處之法僉曰莫如報稅蓋田須得水則待溝也溝而報稅則溝卽田矣渾溝與田而一之彼繼欲奪其利於附溝之田而敢絕其流於卽田之溝乎此法行則吾儕共安樂利而忠介公之遺澤亦永垂無窮矣遂具呈於縣定其稅著爲禁令凡有高築隄防專事壅塞以致灌溉不周者官治之鄉衆以記屬余余思青草等地皆吾宗族之所處也開此渠者創自忠介而余族從祖績公與有力焉夫水利之興農田永賴上關國計而下爲民生在後之人當遵其禁令俾長流不息澤潤田疇不忘前人疏導之功以收後人長享之利是余之所有望於來世也因述其顛

瓊山縣志

卷十七

金石

五

末而爲之記

道光五年歲次乙酉冬月里人王承烈撰並書

案此溝水利灌溉官隆一里大豐洋田十餘里所關民生最大今近田大路並築以石藉便往來下通水閘以順流通亦免泥崩塞溝隨時常有小爲疏濬

重增雁峯書院膏火碑

學校者所以維風俗人心以興起文物者也我國家殷殷立教澤宮而外各府州縣皆勤有司謀及地方紳士設立書院以樂育英才而又置田爲修脯資瓊邑雁峯書院在瓊郡治貞院東前令于君改社學爲書院講堂學舍煥然一新乃經費不足霑溉無幾故肄業者尚屬

寥寥苟非增其餼稟廣其額數將何以可大可人振士
氣維風教於勿衰余蒞任之始入院觀風慨然有志增
益首先捐廉俸洋銀四百四十元易制錢三百五十二
千文爲倡爰謀之值事廩生林瀛王魁衡等廣集邑之
紳士設法勸捐凡吾力所可及與眾志所樂輸者不憚
多方籌畫務期集腋成裘積篲成山閱一歲共勸捐得
洋銀三千四百二十元易制錢二千六百四十八千文
共結得銅錢三千千文發當商生息按季分繳爲添增
膏火之需從此膏偕春潤火以薪傳琅琅書聲出於金
石而余亦得於簿書之暇相與橫經講學循循於孝弟
之行兢兢於禮義廉恥之大庶幾氣運文風日新月盛

瓊山縣志

卷十七

金石

三

上副朝廷樂育之意不獨斯文之幸亦官斯土者所厚
望也事旣成因定章程並誌捐貲姓名勒石以示來茲
是爲記

賜進士出身補授瓊山縣知縣加二級紀錄五次關中
蘇葵撰

道光九年歲次己丑秋月立

重修觀稼亭記

碑高四尺闊一尺五寸分十一行每行三
十九字後勒名分二截平列

觀稼亭在城北里許其地山川幽雅水木清華爲東坡
先生讀書處有東坡書院金粟菴洞酌亭諸勝前人於
洞酌亭側添設三楹顏其額曰觀稼面臨平阪旁滄清
泉有溪河一道自東環折而西兩岸綺錯阡陌縱

績士大夫遊息於此人比之裴中立際野堂洵爲城北
第一名勝亭久不治日就傾圮紹施涵川下榻節署
以治事之餘暇借壬午莊陳俯菴諸幕府暨瑞輯五張
小蘭諸公子醴白金二百購料撤而新之登其亭巽然
而高明臨其軒廓然而清迥彌望延緣凝碧蒼茫十頃
相與奏鳴琴流水之曲登高作賦逸興遊飛致足樂矣
顧吾讀幽風一詩叙述農事自于耜舉趾以至築場納
稼其事至纖至悉一則曰嗟我婦子再則曰嗟我農夫
言不足而長言之咨嗟歎息極之指搨卒瘁終年作苦
而不敢告勞是以王政重之迎貓祭虎御田祖息老物
著爲典章所以恤之者蓋至周且備焉登斯亭者顧名

瓊山縣志

卷十七

金石

古

思義念農人疾苦思粒食所由來當必怛然有動於中
非徒爲宏農坐嘯也余嘉諸君子雅量高致能興廢舉
墜不使勝蹟久而就湮故記之經始於道光十四年九
月越三日告成依金石例刻捐輸姓名於左以風後之
遊此亭者

道光十四年仲冬月護理雷瓊兵備道張塢春撰并書
滿洲瑞輯五浙紹陳俯菴浙紹壬午莊浙紹張德威四
川夏恒齋江蘇王信夫浙紹張德標浙紹張鏡堂浙湖
張靜齋浙紹朱芝軒嘉應李憲曾浙紹陸漸泉浙杭錢
匡夫浙紹張芹浙紹施涵川浙紹張德明浙紹張德
成浙紹趙裁莊浙紹王芷庭直隸陸宗肅黔南郭警齋

昭忠祠碑

瓊州爲南極粵區外海內黎防守綦要蓋山海危險之區亦志士慷慨立功名之地也朝廷設水陸大營立闔帥領重兵鎮之萃材勇之士養之行伍之中優其廩祿設之官准之長教孝教忠使之諳練服習以成剛果健銳之材異日建功立業由此其選其或遭際叵測罹於禍患則贈終有制恤亡有典享祀有祠嘉慶八年勅建昭忠祠續奉恩旨准將出洋捕盜傷斃淹斃各官兵附祀著爲令瓊郡昭忠祠向在東郊浮粟菴之左近歲遇風災祠宇傾圯木主填委瓦礫中道光十二年本鎮黃公建功巡洋舟覆隨行官兵殉者百餘人皆不得入祀

瓊山縣志

卷十七

金石

七

露濡霜降之辰令人盡然傷感權中府何公朝亮倡議改建新祠僉以爲然因相與規畫各祠請於鎮府設冊勸捐道府廳縣暨各標營將領兵弁皆踴躍捐輸贊成此舉得地於嶺嶺門外創建祠堂三楹崇隆巍煥規制巋然中祀黃公建功而水陸各營前後出師陣亡洋巡淹沒并捕黎傷斃官弁兵丁悉以次設位祀焉祠在水陸兩營適中之所與江張二公祠衡宇相望死事諸人隸瓊籍者多居近祠數里之間其父兄子弟瞻望豐祠屹立念祠之所由來與官之所以隆重此祠者咸咨嗟太息感激泣下甲午夏新祠落成余由廉州守來權兵備具牲醴設長筵奏軍中鼓樂合寅僚肇修禋禮一時

冠帶之弁稱戈之伍相與駿奔走執豆邊莫敢不共其
敢不祇若是役也泯人神之恟贊聖天子旋揚曠典使
人觀感奮發鼓其忠義之氣而堅其敵愾之心有裨於
世道人心誠非淺鮮至於率作興事必躬必親則何公
暨署右營守備黎君必榮實爲之余爲綜其始末書諸
石後之登斯堂者必怵然有動於中而以諸君子爲當
務之惡矣是爲記

廣東分巡雷瓊等處兵備道兼管刑驛豫章張堉春撰
並書

道光十四年歲次甲午秋月立

重修懷沙亭碑記

瓊山縣志

卷十七

金石

五

嚮游秀英懷沙亭竊嘆古人友誼之敦雖寸簡尺牘猶
銘誌弗諼因思古賢名區皆足起人敬慕此蓋相契於
道德之原而感孚在性天之內如前明任公廷貞之建
懷沙亭是已公以提舉司來官於瓊首以興賢育才爲
念其於陳白沙先生仰慕已久遙致書幣求爲海外多
士式時先生讀禮家居辭不就公得復柬情難自已敬
鐫於碑築亭名曰懷沙爲後學示典型建在樂古書院
復倡立義學於行署所歷有年所矣明季兵燹亭圯忽
生大榕張蓋其上鄉先達陳公家修柯公呈秀感其異
邀衆捐修樂古書院並懷沙亭由是文教日興士風丕
振歌鹿鳴來謁者常接踵夫非汪公好賢之誠勗於前

得陳柯二公繼善於後曷克臻此迄今百有餘年屢有
墮壞經庠生張書紳符大經耆民陳聖潤等以時捐修
茲則院宇崩坍惟豐碑若靈光巋然弔古者過而愴懷
意先生之流風遺澤當必有人起而興之吾友陳子賓
門固此鄉寒酸然生平義勇之氣足激發乎人心慨然
與柯公裔孫益齋謀益齋純誠長厚間里推爲祭酒乃
先會其黨庠若黃善甫莊子陵黃鎔暨前曾有功於之
族子姓若陳氏張氏符氏輩一時三厥父老紳士農商
靡不踴躍援予與鄭君蕪廷同襄厥事以予幼隨先君
讀書其地鄭君雅意慕古皆私心嚮往者也聯請於翁
文宗及當道執事發簿勸捐得銀六百餘元鳩工伊始

瓊山縣志

卷十七

金石

七

適吾師翰山張太史由京邸郵信楊碑並語邑人亟爲
緝葺何眾念甫動而萬里知交心源已遙遙相印耶異
矣是役也竇門備瘁心力工未竣而賞志以沒益齋實
踵其成前後爲楹二繚以垣牆外樹育英坊一仍舊制
落成後同稟於普太守錢明府示撥鹽批圖記歸亭分
發除宜用外每年存款以爲延師修脯委予勒文以垂
久遠予詢於眾曰自今而後學者堂舍可居教者薪水
可供斯夕瞻仰羹牆如見歲時祭祀俎豆馨香異日繼
起有人增其式廓俾羣弟子諷誦其中講求夫道德性
天之學出而黼黻隆平昌明聖道上副聖天子崇儒作
人之雅化安見瓊臺風月不輝映於江門紫水間平猶

憶賓門輔留之際執予手以此事始終相屬今幸獲觀厥成可告知己於地下而臨文太息摩挲古碑恍觀海
水滌泗嶺雪縈繞殆將移情焉

瓊山後學林

瀛鶴舟甫敬撰

瓊山後學鄭

璣薌廷甫敬書

道光十四年甲午仲春月吉旦闔邑紳耆士商民等仝
立